



無錫金匱縣志

卷之二十一

儒林 文苑 忠節

ル 5
3047
9



門ル 8
號 3000
卷 9

門ル 6
號 2300
卷 9

門ル 5
號 3047
卷 9

無錫金匱縣志卷二十一

儒林

自漢宋分馳而談理者或離經訓治經者或疏義理墨
守而相譏通儒蓋兩病焉夫生三代後而希聖賢要旨
固舍經末由知窮經以求理則其道未嘗不合無錫學
者莫盛於南宋迨顧高諸君子出海內翕然宗之聲氣
既廣或不無流弊然是數君子者固無得而訾也 本
朝崇尙實學士務經明行脩服古之儒彬彬盛矣迄今
數十年來餘風未遠而閣束經籍但求速化幾於漢宋
諸儒之傳胥泯焉抑又何歟綜而觀之可以知世變矣

昭和九年
六月廿八日
購求

志儒林第二十三

宋

凌浩字直翁與同邑陳敏同學於胡瑗以經術知名治平二年進士嘗知蓬萊武涉二縣以能名召拜太學博士推胡氏之學以誨士士皆敬服之出判辰州知渠陽年六十五致仕

陳敏字伯脩年十一喪父哀毀廬墓有芝生焉與同邑袁默凌浩吳郡孫載同受業胡瑗之門號爲四俊熙甯三年進士王安石奇其才薦敏堪大用除太學正出知台州會郡國立元祐黨人碑敏不從監司趨之敏曰嗟乎誣司馬公爲姦是誣天也通判某竟立石敏碎之掛冠去自號濯纓居士大觀中以八行搜天下士殿撰李夔薦於上守令勸駕敏嘆曰昔歸今往於出處之義何居弗就敏與蘇軾游甚厚軾嘗遺之書曰風氣凋喪植立於頽波狂瀾中唯吾伯脩與景純謂刁約而已敏卒年八十有一

喻樗字子才其先桐廬人至樗乃徙居無錫少慕伊洛之學從楊時游中建炎三年進士第嘗謂趙鼎曰公事上當使啟沃多而施行少啟沃之際當使誠意多而語言少鼎都督川陝荆襄辟樗爲屬紹興四年金人入寇趙

鼎勸帝親征樗見鼎曰公自度此舉果出萬全乎或姑試一擲也鼎曰非鼎所知樗曰然則當思歸路毋以賊遺君父憂張德遠有重望居闕今若使爲江淮荆浙福建等路宣撫使俾以諸道兵赴闕則其來路卽朝廷歸路也鼎遂入奏起張浚知樞密院事令視師江上浚至執鼎手曰此行舉措皆合人心鼎笑曰喻子才之功也尋授秘書省正字兼史館校勘金師旣退人謂鼎浚將並相樗獨言二人宜且同在樞府他日趙退則張繼之立事任人未甚相遠則氣脈長若同處相位萬一有不合或當去位則必更張是賢者自相背戾矣後略如其

言紹興間力言和議非便言者希秦檜旨劾樗謗訕出判衡州致仕檜死起太宗正丞轉工部員外郎知蘄州

孝宗卽位提舉浙東常平卒

宋史有傳

尤袤字延之少從喻樗汪應辰游得楊時之學紹興十八年擢進士第知泰興縣縣有城屢毀於寇袤脩築之金人陷揚州泰興以有城得全除將作監簿太宗正闕丞人爭求之陳俊卿曰當與不求者遂除袤虞允文以史事過三館問誰可爲秘書丞者僉以袤對張栻曰真秘書也亟授之遷著作郎兼太子侍讀張說自閣門入西府袤率三館上書諫出知台州會有毀袤者上疑之使

人密察民誦之不絕口因錄其東湖四詩歸奏累遷樞密院正兼左諭德旋除太常少卿高宗崩自南渡後恤禮散失事出倉卒每有討論悉付表斟酌損益當定廟號與禮官定號高宗洪邁請號世祖表言祖有功宗有德太祖規創大業稱祖太宗混一區夏稱宗禮子爲父屈太上爲徽宗子子爲祖父爲宗失昭穆之序將來祔廟在天之靈必有所不安邁論遂屈臺臣請定喪制表言釋老之教矯誣褻瀆請一切禁止進禮部侍郎淳熙十四年有事明堂詔議升配表議方在几筵不可配享歷舉郊歲在喪服中者有四惟元祐間用呂大防請升配神考去大祥百餘日時祖宗用以日易月之制今陛下旣行三年喪高宗雖已祔廟百官猶未吉服請俟喪畢議之詔可上嘗與表論事久語宰執曰尤表甚好前此無一人言之何也權中書舍人兼直學士院辭不許時方言內禪上曰旦夕制策甚多非卿孰能爲之光宗卽位開講筵表論官制近年舊法頓壞使披堅執銳者積功累勞僅得一階權勢貴近之臣優游而歷華要姜特立議爲周必大黨遂與祠起知婺州召除給事中昌言曰某老無所補報凡貴近營求礙法制者雖特旨命書不敢奉詔甫數日繳奏者三韓侂胄以武功大夫和

州防禦使用應辦賞直轉橫行表繳奏入手詔命書行復言侂冑四年已轉二十七年合轉之官今又超授四階復轉二十年合轉之官是朝廷官爵專徇侂冑之求也命遂格耶律适嘿以手詔除承宣使表一再繳奏言天下者祖宗之天下爵祿者祖宗之爵祿陛下安可私用祖宗爵祿加於公議不允之人哉上怒裂去後奏付前二奏出表以後奏不報使吏收閣命竟不行除禮部尙書上屢不省重華宮以表請駕隨出兼侍讀上封事曰給舍臺諫論事不行如陳源奉祠姜特立召尤爲駭聞方特立得志竊弄威福一旦斥去莫不誦陛下英斷

今遽召之譬除蔓草猶懼復生況加封植乎是時上已屬疾國事多舛乞致仕歸八年卒年七十表旣得楊時之傳時爲程頤高弟乾道淳熙間忌者方攻程氏學表在掖垣首言道學者堯舜所以帝禹湯武所以王周公孔孟所以設教近立此名詆訾士君子士君子欲自見於世一舉足卽入其中便無得免此豈盛世所宜有表死數年侂冑擅國禁錮道學士大夫皆受其禍識者服表爲知言表容貌端凝晚益嗜書積至三萬餘卷取孫綽遂初賦以自號光宗書額賜之諡文簡

宋史有傳

嘉慶志云宋史言表卒於位尤玘萬柳溪邊舊話則稱表致仕後卒於家今從舊話

李祥字元德隆興元年進士爲錢塘縣主簿攝錄參時邏者以巧發爲能每事下有司必監視鍛鍊囚服乃已嘗告一武臣子謗朝政鞫於獄祥不使邏者入門旣而所告無實具白臨安尹姚憲憲驚曰上命無實乎祥曰卽坐譴自甘迺具論如祥意上曰朕幾誤卿吾爭臣也遂賜憲出身爲諫大夫祥調濠州錄事參軍安豐守臣冒占民田祥卒論歸之民累官國子祭酒慶元元年丞相趙汝愚以言去國祥疏曰頃壽皇崩兩宮隔絕中外洵洵留正棄卽亡去國命如髮汝愚不畏滅族決策立陛下風塵不搖天下復安此社稷之臣也奈何無念功至

意使精忠巨節怫鬱黯闇其何以示後世除直龍圖閣湖南運副言者劾罷之太學生楊宏中等六人上書留之并得罪祥學於尤袤學識純正祿入悉散親舊家人勸買田宅不聽以直龍圖閣致仕卒諡肅簡

宋史有傳

沈有開字應先父松年見文苑傳有開從呂祖謙游其學志其大者不務華藻口耳淳熙五年進士爲太學博士下簾竟講不妄請謁留正異之揖與語聳聽移日正拔擢淳熙知名士有開實陰贊之而不以爲功教嘉王邸進講必嚴君子小人之辨甯宗卽位遷起居舍人嘗宣入禁中賜坐問民疾苦忌者乃排以僞學廢斥十年旣

而起知徽州改太平不行以直龍圖閣致仕家居落寞
貴者求見皆以老疾辭而獨與朱熹通書問焉

蔣重珍字良貴嘉定十六年進士第一簽判奉國軍紹定
二年入對首言自天子至於庶人所當先知者本心外
物二者之界限界限明則知有天下治亂生民休戚而
已何樂其尊奉哉遷校書郎行都火應詔曰臣頃進本
心外物界限之說蓋欲陛下親攬大柄不退託於人盡
破恩私求無愧於已昔周勃今日握璽授文帝是夜卽
以宋昌領南北軍霍光今年定策立宣帝明年稽首歸
政今臨御八年未聞有所作爲進退人才興廢政事天

下皆曰此丞相意焉有爲天子爲人之主而自朝廷
達於天下皆言相不言君哉天之所以火宗廟火都城
者殆以此況九廟至重事如生存而徹小塗大不防於
火之未至宰相之居華屋廣裘而焦頭爛額獨全於火
之已然亦足以見人心陷溺知有權勢不知有君父矣
他有變故何所倚仗哉昔史浩兩入相纔五月九月而
罷孝宗報功甯有窮已然如此其亟何哉保全功臣之
道可厚以富貴不可久以權也上讀之感動他日星變
復申前說進爲君難六箴端平初入對上五事乞召用
眞德秀魏了翁帝曰人主之職無他惟辨君子小人重

珍對曰小人亦指君子爲小人此爲難辨耳兼崇政殿說書戒家事勿以白務積精神以寤上意每草奏齋心盛服有密啟則手書削橐時史嵩之旣失相主出師關洛詔百官集議重珍力爭乞專意備守不得已則用應兵旣而關洛師大衄復進兵重珍言若恥敗而欲勝之則心不平而成忿氣不平而成怒生靈之命豈可以忿怒用哉又言更化以來舊弊未去者五今又益以輕易遷起居郎以疾求去以集賢殿學士知安吉州權刑部侍郎三辭不許自劾不能取信朝廷之罪詔守刑部侍郎卽致仕重珍生十歲而孤母顧氏親教以書一覽輒

記從尤袤游講伊洛之學與真德秀魏了翁友善卒諡

忠文

宋史有傳

虞薦發字君瑞其先丹陽人性孝友未弱冠鄉試高等宋亡避地無錫遂家焉學成行脩而不肯爲世用無錫學久廢強起薦發爲師招諸生講說義理士皆聞風自遠而至時士人有田籍者官俾給驛傳薦發極言於上官得免爲鄉校官十餘年未嘗受廩祿當路交辟辭不就自號薇山老人以見志學者因稱薇山先生延祐元年初行科舉左丞許某董試江浙徵之乃曰吾所避者利祿耳今幸無是遂應命經疑問忠恕或引天地忠恕以

對閱者乙其處薦發曰此程子之說於是黜而復取者
數人子志道

元

虞志道字彥高薦發子幼閑家訓弱冠以茂異起爲校官
其學務明體適用爲文章必本於理教授湖州以嘉興
尹致仕平生踐履篤實於義利之辨尤明

陸以道字士宏明易溯程朱之源獨得象外旨至正二年
進士授校官累遷翰林待制著宋鑑提綱

明

邵寶字國賢年十九從江浦莊昶學成化二十年進士授
許州知州月朔會諸生於學宮講明義利公私之辨改
魏文帝廟祀漢獻帝易獻曰愍從昭烈所諡也巫言龍
骨出地中爲禍福寶取骨毀於庭杖巫而遣之躬課農
桑推行朱子社倉法入爲戶部員外郎郎中擢江西提
學副使釋菜周元公祠脩白鹿書院學舍以處學者江
西俗好陰陽家言父母死或數十年不葬寶著令不葬
親者不得與試其俗遂革宸濠每請爲詩文輒峻卻之
濠敗有司校勘書札寶獨無一字歷遷浙江右布政使
與鎮守太監勘處州銀礦寶曰費多獲少勞民傷財卒
奏寢其事正德四年拜右副都御史總督漕運嘗議事

至京師會劉瑾惡漕督平江伯陳熊欲論殺之一日劫寶於左順門將逮之尙書張綵曹元自內出謂公第劾平江則事釋矣寶曰平江功臣後督漕未久無大過不知所劾越三日給事中劾熊并及寶勒致仕去瑾誅起巡撫貴州累進戶部左侍郎命兼左僉都御史處置糧運以母老乞歸乃拜南京禮部尙書以便養再疏辭免嘉靖初起前官復以母老懇辭許之命有司以禮存問比終母喪未幾卒贈太子太保謚文莊寶生三歲而孤事母過氏至孝甫十歲母病爲文告天願減己算延母壽及終養歸得疾左手不仁猶朝夕侍親側不懈學以

洛閩爲宗嘗曰願爲眞士夫不願爲假道學文章典重碑版遍天下博綜羣籍有得則書之簡取程子今日格一物明日格一物之義名之曰日格子嘗築二泉書院

於惠山之麓世稱二泉先生

明史有傳

王問字子裕少從邵寶游以學行稱嘉靖十七年進士授戶部主事監徐州倉改南京兵部南京額設馬快船七百八十餘艘歲脩役卒四千有奇病民滋久問白尙書爲酌款紓之時累有邊警問預籍武健而厚其廩食比罷歸多有溢領或請追之問曰人輕其死以來來又撤還而官奪其餘他日朝廷更下尺檄誰復至者官南曹

時迎其父澤澤不欲行而令問畫三十扇扇各一詩自
朔至晦日持其一以代子之侍前也比擢廣東僉事瀕
行父愴然有離別之色問內自悲循其裾而歎久之曰
吾終不能爲温太真矣行至桐江投劾歸終父養不出
問工詩善書畫清脩雅尙士大夫皆慕之卒年八十門
人私謚曰文靜先生

明史附
邵寶傳

子鑑見宦望傳

談縉字朝章少薄章句潛究聖賢之學應事從容不動聲
色爲時所重臺使者行部必式其廬嘗與同里楊文張
綬莫止虞祚輩結崇義會張綬字朝紳力學好問官東
陽訓導與諸生闡明金許之學

顧憲成字叔時父學倜儻負氣自邑之上舍獨身徙涇皋
日食一糜而信孚鄉黨久之遂用起家憲成以鄉試第
一人舉萬曆八年進士除戶部主事大學士張居正寢
疾朝士爲羣禱於神同官代署憲成名憲成聞亟馳赴
手削之改吏部會大計京朝官都御史辛自脩以斥尙
書何起鳴忤執政爲言官劾罷憲成上疏語侵閣臣謫
桂陽州判稍遷處州府推官累擢至吏部員外郎時有
三王並封之議憲成以太子爲天下本與諸王就王爵
有不可者九乞令皇元子早正儲位語甚愷切并上書
大學士王錫爵其後並封議遂寢二十一年內計吏部

尙書孫鑰考功郎中趙南星盡黜執政私人憲成實左右之南星罷憲成亦自劾請與同罷不報尋掌選事又會推閣臣憲成所舉益與執政牴牾坐削籍憲成在文選嘗言閣部既不同心惟有三十巡撫十三提學吏部猶可選擇使皆得其人天下事庶幾少補未幾竟得罪去憲成既廢名益高中外推薦無虛日悉不報歸脩復東林書院與高攀龍輩講學其中月爲一會悉遵朱子白鹿洞規時有管氏之學一貫三教而憲成獨排無善無惡之說以發明性善爲宗嘗曰聖人教人爲善去惡而已爲善爲其所固有去惡去其所本無又曰論本體

只性善二字論功夫只小心二字准撫李三才被論憲成遺書葉向高孫丕揚御史徐兆魁以其出位疏攻之吳炯上言憲成被誣恐天下以爲戒絕口不談孔孟之道國家正氣從此而損亦不報憲成初以投閒講學未嘗欲樹壇坫久之應和既廣頗以操持國是激揚清濁自是發科場弊勘熊廷弼爭三案攻魏闖其人率目爲東林而羣邪害正者遂益以東林爲的致類東漢黨人之禍自憲成歸十餘年起南光祿少卿不拜尋卒熹宗立贈太常卿魏忠賢亂政其黨石三畏追論之又削奪崇禎初贈吏部右侍郎諡端文

明史有傳

顧允成字季時憲成弟性耿介自厲名節萬曆十一年進士十四年赴廷試對策卽陳內寵將盛羣小將逞語侵貴妃乃抑置末第時御史房寰疏詆右都御史海瑞允成不勝憤與同榜進士彭遵古諸壽賢上疏劾寰欺罔七罪坐削籍久之起南康府教授以母病不行既終喪補保定累遷禮部主事會三王並封與張納陞岳元聲合疏諫言元子封王祖宗以來未有此禮陛下安得叔之吏部尙書孫鑰以拾遺事被責允成謂閣臣張位實爲之上疏論位及錫爵并侵附執政者上怒謫判光州歸與兄憲成講學東林辨析狂狷中行之說意以狂狷

自處而疾世之爲鄉愿而託於中行者允成居官先後

僅六十日卒贈尙寶司丞

明史有傳

安希范字小范如山子萬曆十四年進士授行人歷南京吏部主事時王錫爵秉政多斥異己者希范上言近年以來正直之臣不安於位敢言之士削跡於朝如趙南星孟化鯉趙用賢天下皆知其賢乃次第屏黜孫鑰李世達李楨雖材器不同而其目爲正人君子鑰世達先後去國楨亦累疏乞休高攀龍一疏此陛下之忠臣輔臣之諍友楊應宿疏辨實塗面喪心乃應宿僅薄謫而攀龍反重斥夫閣臣之職輔皇上以進賢退不肖今賢

者以異已黜不肖者以媚已進誤國不忠莫大於此疏入削籍歸會東林書院成希范別構一室讀書講學其中所居膠山多清川長薄又樂吳興山水晚而卜居武康天啟初贈光祿少卿明史有傳子廣居字無曠高攀龍女婿也由舉人中崇禎十六年會試乙榜應得縣令自免歸方攀龍赴止水死家禍且不測廣居力護持之甲申春都城陷慟哭乞死及秋而卒

高攀龍字存之材孫萬曆十七年進士出吏部員外郎趙南星之門授行人四川僉事張世則進所著大學初義其說一遵古本詆程朱章句之誤請頒天下攀龍上言

極陳其邪妄非祖宗之訓帝嘉納時當國者頗持異同部院大臣多以不合去國至是謫南星等吏部一空攀龍疏言中外羣言皆曰輔臣除不附已近侍不用正人陛下深居九重曾以諸臣賢否較量果皆由聖怒則自孟化鯉而外未聞忤旨輔臣王錫爵等是非邪正尙不能辨不過洩其私憤利於斥逐之盡末言鄭材楊應宿輩讒詔宜黜應宿亦訐攀龍謫揭陽典史既歸築水居於漆湖而居之會顧憲成亦以言事罷因相與脩復東林書院讀書講學垂三十年天啟初起光祿丞進少卿劾戚畹鄭養性及其黨不報轉太常寺禮部尙書孫慎

行追論紅丸歸罪舊輔方從哲事下廷臣議攀龍議從哲之罪非止紅丸最大者在交通國戚表裏爲奸所以謀危先帝者不一此賊臣也無逃首惡之誅且討賊則爲陛下之孝說者乃謂爲先帝聖母隱諱爲孝明如聖諭目爲假託忠如楊漣謗爲居功人臣避居功甘居罪君父有急袖手旁觀是忠孝之說皆可變亂何事不可妄爲時從哲輩輿援甚固摘疏中不孝語激帝怒將加嚴譴閣臣葉向高力救得免遷太僕寺卿都御史鄒元標馮從吾建首善書院於京師攀龍時與講會給事朱童蒙因疏訐爲朋黨於是元標等皆去位攀龍乞休不

許進刑部右侍郎尋推左都御史時趙南星爲吏部尙書攀龍謂師弟子不當分掌部院力辭不得既就職則劾罷魏忠賢私人御史崔呈秀先是副都御史楊漣劾忠賢二十四大罪於是其黨嫉忠賢曰東林必殺公御史陳九疇遂因會推奏部院徇私而南星攀龍俱罷明年盡毀天下書院戍南星逮楊漣魏大中等殺之而削攀龍職既又逮周順昌等并攀龍七人收者至攀龍先一日拜遺表自沈園池以死崇禎初贈太子少保兵部尙書諡忠憲初海內學者率宗王守仁攀龍心非之著無善無惡辨其學本於靜而以真知實踐爲主粹然一

出於正進脩次第詳所著困學記中方之揭陽時憩旅舍小樓讀二程語至萬變俱在人其實無一事恍然曰果無事也自是學日進卒年六十有五

明史有傳

葉茂才字參之萬曆十七年進士授刑部主事改南京工部權關蕪湖請以課羨數千金餉邊且言久旱始通故有羨請不為例改南吏部郎中告歸起歷南太僕少卿御史唐世濟疏斥建言諸臣指為邪議茂才上疏爭之不報其黨給事中官應震輩連疏攻茂才再疏折之竟自引去是時黨人悉踞言路他曹有言必合力逐之茂才既去人無復敢操異議者天啟初再起太常不赴四

年擢南京工部右侍郎甫二月致仕茂才通籍四十年十九在告與顧憲成高攀龍講學東林意所不可不為苟同攀龍殉難茂才力免其子於禍家貧苦節以布衣疏食終其身崇禎初卒賜祭葬如禮

明史有傳

陳幼學字志行萬曆十七年進士授確山知縣政務惠民積粟以備荒給貧民牛五百餘頭里婦紡車八百餘輛節公費六百餘兩代正賦之無徵者性不通權貴其親戚家人犯法立捕治之汝甯知府邱度慮幼學得禍言於撫按調繁中牟縣南荒地多茂草令民投牒者必入草十斤未幾草盡得沃田數百頃悉以畀民有大澤積

水占膏腴地二十餘里幼學為疏渠引入小清河民獲大利越五年遷刑部主事復以員外郎恤刑畿輔出矜疑三百餘人進郎中遷湖州知府甫至即捕殺豪惡奴會有施敏者士族子楊陞者人奴也二人以大猾橫郡中幼學以計執敏寘諸獄敏賂貴人私屬巡撫巡撫佯謂諸屬吏曰此惡非陳守不能得今當提勘與諸君礫之因日檄取親鞫幼學執不予曰陳某豈戀一官脅以利害即畏人見奪者立杖殺之敏獄詞連故尚書潘季馴子廷珪廷珪惡埒於敏幼學言於御史疏劾之并收繫廷珪是時又論殺他奸豪數十輩獨楊陞畏禍引匿

方置之復念已去陞必逞遂捕致之死一郡大治御史

徵其治行推官閻世科列上三十六事以聞詔加按察

副使仍視郡事後以副使督九江兵備歸再起光祿進

太常少卿卒幼學究心理學晚獨好易著管見不及成

在東林諸人間以吏事著湖人俎豆之至今不衰明史有傳

嘉慶志云幼學在東林以治行著明史入之循吏前志錄入宦蹟傳幼學崇尙正學官刑曹時有某創新說以攻紫陽幼學抗疏斥之又有吳人撰罪知錄指摘宋儒幼學著罪罪知錄一書其闢邪衛道之功甚偉歿後從祀道南謹改入儒林附顧高後

劉元珍字伯先父陞舉人歷任山陽績溪校官高攀龍少

從受經既而同舉於鄉攀龍自言少未知學驟得舉稍

自行意先生呼責之後始自繩檢云元珍萬曆二十三年進士授南京禮部主事歷兵部郎中移疾歸久之赴部候補會大計京朝官吏部侍郎楊時喬都御史溫純盡黜閣臣沈一貫之黨給事中錢夢皋等一貫密爲地詔留臺省被黜者且不下察疏元珍上言沈一貫秉政以來嫉視善類比昵匪人卽如考察一事諒陛下非愛夢皋非私臺省一貫曲庇私人內假公以罔上外挾威以箝下旣借陛下之權以伸其意遂竊陛下之恩以固其交使二百年鉅典一旦決裂一貫敢於欺罔犯清議而不顧如是況有爲之鷹犬如夢皋者將何施而不可

疏上將杖元珍於廷會雷震郊壇燈竿木乃反杖旨削籍歸俄而察疏亦下諸被留者皆自免去元珍歸與顧憲成高攀龍講學東林光宗卽位起光祿寺少卿時遼瀋旣沒前贊畫主事劉國縉以招撫南四衛官民爲名擁眾數萬請發天津登萊船南濟議者欲推爲東路巡撫元珍極言國縉爲人詭秘不可信議乃寢未幾卒官

明史有傳

孫惠恆順治四年進士知閩縣歸讀書爲詩文皆

有家學

許世卿字伯勳萬曆十三年舉人被服東林爲十戒書壁後有嘗以私者曰息壤在彼又戚黨以事麗法甚亟屬

世卿爲解適賣婢爲輸其罰緩而謝之其歿也顧憲成誌其墓

吳桂森字叔美萬曆四十四年貢生學易於武進錢一本受所著管見像鈔因廣其意作像象述東林之興每居講席及高攀龍赴召以會講屬桂森天啟六年拆毀書院崇禎初有旨修復乃建麗澤堂又築小齋名來復日講易其中嘗言有善無惡心之體有善有惡意之動知善知惡是格物知善無惡是致知其自署曰東林素衣弟桂萼亦預東林講席先桂森卒

張夢時初名大受字伯可萬曆三十一年舉人築精舍東林以居與諸儒往復垂二十年謁選得安吉州擒土寇葉朗生餘黨斬之遷山東運同禦登州叛卒之亂功尤偉薦剡屢上竟告歸

宿夢鯉字龍吉萬曆三十四年舉人除松陽知縣問民疾苦請行弭三大患平田六大議以魏闡株連黨禍遽歸少砥文行高攀龍命其三子師事於家塾者十有六年張雲鸞字羽臣從顧憲成高攀龍遊以經師教授里中時溫陵李贄以異學蠱惑人心其說尙行雲鸞爲經正錄闡之崇禎中齋書自獻於朝命學臣察其平生行誼以聞有詔充貢

鄒期楨字公甯從攀龍學每尋格致之義嘗論靜坐期楨曰調息亦頗有益攀龍曰不屑也期楨慙然既而獨心旨所論觀未發工夫以是有得弟期相字公寅從游東林崇禎中御史張纘曾舉賢良方正歷官浙江衛經歷崇禎甲申五月聞國變請當道發喪哭臨及期浙人至者惟山陰劉宗周一人歸里不過私家止於惠山祖祠中病卒

黃廣字冠龍高攀龍赴止水死有旨詰問漏洩之由有司責保狀甚亟無應者廣同華國材慨然署狀以貢除安遠知縣有重囚寇至陽從賊走而道亡自歸者且請出死力守城及部移至應決廣力請竟得釋

華貞元字始得從高攀龍受靜坐說有得嘗留止默對豁然見無隱之象與吳桂森同受易於錢一本平生不啻飲食衣被其中家貧或竟日不爨不以累其心族子允謀允誼允誠與相師友終其身

華允謀字汝翼萬曆二十八年舉人世受易得其精義而用之躬行立家會與高攀龍吳桂森諸人游鵝湖始興起於學授寶應教諭諸生爭地者各讓不取時爲作興讓亭弟允誼字汝正崇禎六年歲貢不赴廷試初偕弟允誠受易於錢一本後從攀龍講學攀龍歿力保持其

家

華允誠字汝立允謀季弟天啟二年進士除工部都水司主事告歸崇禎改元起營繕主事進員外郎明年冬京師戒嚴分守德勝門四十餘日不稍懈帝微行察知之敘功加俸一年改兵部五年六月上言時政三大可惜四大可憂大學士溫體仁吏部尚書閔洪學閣部朋比阿黨陛下勿以神聖之資爲臣下所蔽治法之大爲奸邪所制使名流善類錮於清時士氣人心日趨頑懦如臣言得行卽治臣以僭越之罪亦有餘榮奏上帝方褒體仁純忠亮節疑允誠受他人指使責令回奏迺言體

仁以洪學爲羽翼臣以義憤所激不受指使益發兩人諸交通狀纍纍數千言凡三奏語益厲帝亦悟兩人同里有私迺奪允誠俸半年而洪學亦旋罷去其冬以母老乞終養歸母喪服闋未及赴京而京城陷福王立江南起吏部員外郎見時不可爲在官十三日而歸允誠初受易於錢一本旣得主靜之學於高攀龍攀龍嘗言鳳超允誠號整齊嚴肅殆若性成及將赴止水死拜遺表外獨有遺允誠書其見重如此周延儒之再召也遣人以京卿啖之拒不應及赴南都馬士英先詣之終不報謝國變後杜門讀易順治五年以未薙髮被執就訊無

一語死於江甯市諸孫尙濂年十九亦從死乾隆四十

一年追諡節愍

明史有傳

顧樞字所止憲成孫天啟元年舉人世承家學又親受業高攀龍之門故於忠孝出處之道少而習焉其學以無欲爲體以居敬爲功以闡明性道爲家法而皆探本於易值鼎革屏居涇皋結茆故廬之旁取陶靖節語名之

曰西疇

秦鏞字大音父爾載見孝友傳鏞崇禎十年進士知清江縣邑素僉富民爲馬戶富民竄入胥吏累貧戶鏞以胥吏僉而給其直劇盜嘯聚以計擒斬之築梅家畚建義倉教民稼穡福王時擢監察御史屢上封事不報尋歸南都亦亡鏞獨居城東弓河之上自題曰千休館惟與門弟子講習主靜之學閉門讀易謝絕人事垂十餘年疾革或請歸鏞曰經經者志安可移耶遂卒弟鏞鈇並以文學知名鼎革後棄諸生服

高世泰字彙旃攀龍從子崇禎十年進士除禮部主事擢湖廣提學僉事至則脩濂溪書院遴諸名士數百人講業其中均州劣生某陰導武當太和宮稅監謁文廟令諸生講書於前因有非笑之者璫怒誣以毀拆宮坊文致數十人入告事下學臣勘覆世泰備陳璫僭虐狀爲

諸生辯甚力遂得旨撤瑯罪劣生而解均州獄事竣歸方是時東林書院之毀幾二十年世泰爲重建燕居廟出舊藏先聖木主而祀之春秋仲丁行釋菜禮又次第起道南祠築再得草廬講學其中三十餘年世泰性嚴肅見子弟如賓客子蓮生有文行事母以孝聞又弟肇升亦篤行世其家學

浦凌雲字伯登諸生與弟冲漢並游錢一本高攀龍之門學以居敬爲本當東林難作之日獨與鄒期楨期相兄弟按節脩講會不輟嘗以學行被薦予冠帶居家一遵古禮

堵景濂字濂生維垣孫幼學於東林晚中崇禎十五年舉人巡撫祁彪佳延之幕府以目疾辭歸未幾失明家居教授生徒日使人誦書於前因爲剖析其義先後從學者蓋八百餘人一念慮之失輒自記注名曰自知錄嚴毅字佩之始爲名諸生中歲落拓絕意進取嘗讀高子遺書歎曰吾舍是書將誰與歸因成東林書院志高世泰推毅爲主講學使者聞其名欲禮致之不赴贈額不受或勸以野服報謝亦不答

嚴福孫字祺先父紹宗見孝友傳福孫甲申後棄諸生專意古學幼讀老莊楞嚴意甚善之既迺大疑務求正學

苦心讀易積十五年著通義九卷不徇諸家不爲僻解期明白簡當而後已又善太極大衍諸象數之學時廢寢食而得其解爲易象圖義五卷

錢爾登字叔嘉九歲喪父事君母吳生母譚竭誠盡敬崇禎十六年進士出給事中吳麟徵之門爾登見時事日非遽歸福王時授長興知縣地阻山瀕湖羽檄旁午爾登戢境均徵民不知亂聞金陵不守將圖後舉莫應遂去官里居寢處一小閣當路敦勸不出堅臥三年卒爾登師事高攀龍篤服其所著書歿以爲殉

張夏字秋紹諸生少遊馬世奇之門著孝經衍義補雜聞源流錄於易書詩春秋皆有解義睢州湯斌撫江南甚重之講學東林者以夏爲大師性疆記多識邑中舊聞軼事故家譜牒瞭如指掌年八十餘以遺民終

錢肅潤字礎日幼從學於鄒期相期相故高攀龍弟子也授以靜坐法頗有得既補博士弟子員鼎革後棄去隱居教授當事見其衣冠有異執而笞之折脛肅潤笑曰夔一足庸何傷因自號跛足生自此名益高四方學者尊爲東林老都講年八十八卒於家

國朝

顧祖禹字景范家對宛溪號廊下顧父柔謙爲贅壻昆湖

譚氏生祖禹祖禹故間自署常熟實世錫人也中歲與黃庭結鄰遂家膠山祖禹少負異才博綜羣籍出游踰嶺嶠而歸崑山徐乾學奉

敕脩一統志延致祖禹與太原閻若璩常熟黃儀德清胡渭四人於家四人之學尤精地理又得傳是樓藏書參稽窮討各有撰著而祖禹則成讀史方輿紀要一百三十卷凡九州山川形勢阨塞圖經瞭如指掌自禹貢職方桑經酈注而下一大歸宿也祖禹又與甯都魏禧爲金石交禧客死蕪湖祖禹往紀其喪祖禹在志局時乾學將薦起之力辭罷有馬澗者世奇從孫從祖禹游亦

嘗入志局祖禹纂方輿書澗與參考焉

秦松齡字留仙弱冠中順治十二年進士改庶吉士授檢討以通糧案削籍康熙十八年舉博學鴻儒復原官歷左諭德再典鄉試又以磨勘落職至四十二年

南巡始給還原品官京師時大學士滿洲某公欲招致松齡屬人道意卒不往嘗以薦從軍荆襄督師蔡毓榮請於軍中講學松齡爲陳說忠孝大義介冑之士無不悚聽平生於書無不窺以詩古文名世晚益耽研經訓尤深於詩自毛鄭以下旁及歐蘇呂嚴諸家參以己見補朱傳所未備有毛詩日箋四卷行世別有書經春秋日

箋未卒業

秦松岱字燈巖松齡弟國子生幼讀王守仁傳習錄高攀龍靜坐說因有志於學後師事族祖鏞鏞故攀龍入室弟子自是識解益進時整屋李暉武進惲日初慈溪黃宗羲皆前朝遺老以講學相應和松岱馳書質証往復累千言家故豐而菲衣糲食治家一守古禮

秦道然字雒生松齡子少時資頗鈍發憤誦讀遂能融貫經義爲文卒成名家康熙四十八年進士改庶吉士年已五十有二尋官禮科給事中掛藩邸事在圍屏十四年著困知私記明儒學錄貌益充視聽益精明乾隆初得釋優游十餘年卒年九十

高愈字紫超諸生攀龍從孫十歲讀攀龍遺書卽有志聖賢之學既長熟復諸儒語錄務躬蹈力行不尙議論謂士求自立當自不忘溝壑始家貧父性豪嗜酒愈委曲承奉之或父就人飲則遣僮往候而已屏立路旁俟與主人別則趨而翼以歸以爲常先後居親喪不飲酒食肉不內寢嘗受知於學使高裔歲科試皆第一時山西姜櫛主文幕於江南之士獨賞愈與桐城方苞及已卯櫛來典試苞以第一領鄉薦而愈已不與試櫛歎息而已巡撫湯斌舊識愈雅重之屬縣官致意再三卒不往

謁晚年益窮困嘗餒糜七日矣方挈其子登城眺望意充然樂也生平覃精經術爲周禮解凡數十易稿華學泉以春秋相質愈言聖人據事直書而義自見爲辨正諸家之失甚力顧棟高少從受業亦往往宗其說云又嘗作小學纂注卒後四十年學使尹會一頒行其書

劉齊字言潔元珍曾孫性耿介以貢入太學名聲壓其儕輩應試順天有欲援而進之者齊作閨女詞五章謝之教習官學生期滿叙於吏部例以十之八授縣令爲正途下則授州佐爲冗雜且底滯無選期是時某侍郎遣人禮先於齊曰君來見必爲選首齊笑曰吾不以一刺

易科第肯以此易縣令耶卒不往某啣之繫籍州佐或勸納粟爲教官齊與邵緒廣書謂教官雖微當爲諸生分別義利之辨奈何己先以納粟進卒卻之歸數年卒年四十七桐城方苞大書其墓道曰狷者劉言潔先生之墓緒廣字經農篤學好古於六經子史靡不窮究著書甚具人品峻潔與齊相埒

錢仲選字禹田性高潔非其義一介不取窮研經義尤多讀儒先書少以孝行聞儀封張伯行撫吳檄縣令延主東林講會仲選講有子孝弟章一座傾聽平居不食肉惟食蔬菜閒佐以魚腥而貌益豐腴年九十一卒

華學泉字天沐世居邑之鵝湖與兄學瀚弟學潛並敦孝友年四十餘鍵戶一室讀書窮日夜不倦足未嘗躡廳事與黃瑚陸楣共爲古文而學泉尤以經學著所著儀禮喪服或問高愈極稱之儀封張伯行撫吳屬教官某延主東林講會謝不赴後數年卒年七十六平生尤邃於易顏其室曰讀易廬

顧培字酌滋與族弟鏊同受業於宜興湯之錡有志聖賢之學時武進金敞長之錡三歲而師事之錡之錡卒培與敞築室於錫山之麓曰共學山居以招四方學者其學以靜爲本而以九容九思爲入道之要每春秋兩會

遵高攀龍復七規遠方至者常不下百餘人敞卒培與鏊主其事家故豐裕後日益貧至晚年日閱無儲而接引學者諄諄不倦年七十九卒

顧鏊字雋生年二十六始志於學習靜三十年用力勇猛徹夜無倦容自號恒惺取常惺惺義易簣時猶延族兄培至榻前講學不輟其與培共主講席也學者恆樂培之和易而苦鏊之嚴毅然誠意懇至其面刺人過初若不容久之無不心服

鄒祖綬字天日期楨曾孫少卽有志於學歷事湯之錡金敞與顧培兄弟同主講席爲人樸訥寡言而自守廉潔

家極貧未嘗假人一錢聞爲古文爲甯都魏禧所稱賞以布衣終同時逮事敝者又有姚琛蕭銘功及祖綬從子雲升雲升尤覃精儀禮之學

孫裘仁字立三繼皋元孫父維嘗從宜興湯之錡學仁年十九刻意厲行束躬收斂時其學山居方盛乃從顧培顧鏊遊講求高攀龍靜坐之學每春秋舉行復七會會者近百人仁據坐講說日昃歌詩數章聲出金石晚以貢人都同邑吳鼎言於江陰楊名時擬上疏薦之仁力辭未幾卒於京邸子諸生錫信孫訓導開濟並敦士行華希閔字豫原以副貢生爲涇縣教諭中康熙五十九年

舉人雍正十三年以博學鴻詞薦不赴乾隆十六年年八十恭迎

聖駕於惠山孝子祠

賜知縣職銜尋卒希閔篤嗜儒先書勤於著述雅好脩先賢古蹟如復邵文莊墓築高子水居重建松滋王侯祠皆鉅舉也嘗埋父遺金於地撫幼弟希閔成立而予之平生慷慨尙氣節巡撫張伯行與總督噶禮互揭主其獄者庇噶禮而罪伯行希閔上書斥之幾罹旤後卒如希閔言

顧棟高字復初康熙六十年進士授內閣中書以奏對越

次罷官乾隆十六年

詔舉經學侍郎鄒一桂以棟高薦授國子監司業銜嘗入都

召見棟高奏對首及三吳敝俗請以節儉風示海內

上嘉之賜七律二章二十二年

南巡晉祭酒銜又

賜傳經者碩額以寵之棟高少受經於舅氏華學泉暨高愈通三禮學於諸經沈潛往復鉤貫旁通久之用史遷諸表例著春秋大事表一書又著毛詩訂詁五十餘卷並經進呈同時華孳亨字子宏與棟高並習儀禮嘗畫

宮室制度於棋枰以棋子記賓主升降之節器物陳設之序如以身揖讓進退其閒蓋篤學如是棟高撰大事表每一篇成必以質諸孳亨

王繩曾字武沂少受學於舅氏秦道然講主敬之學墨守繩尺言動必於禮年五十餘以雍正八年進士官揚州府教授既歸主講東林書院尤能造就後學及門如顧奎光秦朝釭後並以品學著

吳之枚字卜臣世居邑之閩江少喪父家貧年十八未知書採樵以養母會以逋賦爲縣吏所辱或云爲弟子員則可免乃發憤讀書孫祁雍誨之作文之枚晝夜苦讀

食止粥一盂壅數莖秦道然聞而餽之食之枚笑而卻之繼登道然門之枚性素魯道然授以高子遺書一見有省服膺終其身

黃施鏐字虞封雍正元年進士知登封縣鏐條奏請開經筵以廣

聖學改淮安府教授自河漕大府以及郡守靡不重其人凡興利除弊伸冤鋤強請無不行行無不當人意而鏐無毫髮私尋以卓異薦大學士陳世倌請講周易鏐爲說泰卦謂內君子外小人爲泰此是今日要著亦是公身上要著是冬世倌以體用兼優薦授國子監博士性至孝弱冠時父邁常守秦某之禍幾不測鏐除夜肩行囊走二百八十里瀝血顛呈大府事始白

吳鼎字大年乾隆元年進士鼎幼而嗜學穿穴宋元明儒之書而沈酣於六經撰三正考以駁胡安國夏時冠周月之謬於易三禮尤深暇與仲弟鼎及蔡德晉秦蕙田龔燦爲經會尙書楊名時以經學薦未授官成進士授工部主事聞父訃歸尋歿鼎字尊彝舉人質性過人治經博而能約以蕙田薦舉經學授司業歷侍讀學士其學尤邃於易與同時唐誠往復辨論誠字以誠精小學謂文字與卦畫同出一原著勺文若干卷既歿鼎爲叙

其書鼎弟熙進士亦深於經尤精律呂龔燦字繩中早卒

蔡德晉字宸錫雍正四年舉人年十五卽覃精三禮至忘寢食合儀禮周禮爲禮經周禮以六官爲序而考工記不冠以冬官儀禮以五禮爲序而闕軍禮又補逸禮八篇爲本義三十九卷戴禮則刪蕪去複博採周秦兩漢之書及先聖格言之有關於禮者爲禮傳本義二十卷又輯通禮五十六卷積四十年十易稿而後成江陰楊名時薦爲國子監學正遷工部司務德晉旣以禮經名世謂橫渠以禮教人最得孔門博約之旨故其立身甚嚴燕居能自檢攝飲酒至醉不亂在工部歲卻常例數百金妻子啼饑號寒弗恤也其論三禮多發前人所未發與方苞李紱侃侃辨論悉有据依

秦蕙田字樹峯乾隆元年進士第三人累官刑部尙書蕙田少承家學以經術篤行爲江陰楊名時所知本生父道然以藩邸事久繫縣獄蕙田旣通籍伏

闕陳情乞以身贖父罪道然竟得釋領西曹最久遇事沈毅果斷退則閉戶著書其學以窮經爲主生平精力尤萃於五禮通考一書蓋本朱子遺意而參諸崑山徐氏讀禮通考凡閱三十八年而後成因并徐書刻之又奏

請刊正韻書

上命與武進劉綸共任其事蕙田建議古韻二百六部今併爲一百七韻如元與魂痕當析爲二殷韻宜入真韻不當入文韻上聲拯韻去聲證韻宜分出各自爲韻又考定四聲表欲通古音於等韻時已遘疾猶往復辨論不輟云卒謚文恭所著味經窩集亦多說經文字有己入通考者故學者稱味經先生

無錫金匱縣志卷二十一終

無錫金匱縣志卷二十一

文苑

易曰修辭立其誠故文以載道言必有其所以立韓子有言約六經之旨而成文夫亦以經爲載道之書與句吳舊壤季札實生跡其觀樂上國風流滋啟然漢唐之世以文學見於史傳者尙寥寥焉北宋以降人多大雅之才家擅著述之手彬乎蔚乎於今爲盛其言之果合於道與否按其人以考其文亦可以知所折衷矣志文苑第二十四

後漢

高彪字義方家本單寒爲諸生遊太學有雅才而訥於言常從馬融欲訪大義融疾不獲見迺覆刺遺融書譏融養病傲士融省書慙追還之彪逝而不顧後郡舉孝廉試經第一除郎中校書東觀數奏賦頌奇文因事諷諫靈帝異之時京兆第五永爲督軍御史使督幽州百官會餞長樂觀議郎蔡邕等皆賦詩彪迺獨作箴畧曰文武將墜迺俛俊臣整我皇綱董此不虔古之君子卽戎忘身無曰己能務在求賢淮陰之勇廣野是尊周公大聖石碯純臣以威克愛以義滅親勿謂時險不正其身勿謂無人莫識己真忘富遺貴福祿乃存先公高節越

可永遵佩藏斯戒以厲終身邕等甚美其文以爲莫尙

也後遷內黃令

高彪碑作外黃令兄隸釋

帝敕同僚臨送祖於上東

門詔東觀畫彪像以勸學者彪到官有德政上書薦縣

人申屠蟠等病卒於官

後漢書有傳

子岱字孔文性聰達輕

財貴義所友皆世之偉人太守盛憲以上計舉爲孝廉許貢來領郡岱將憲避難求救於陶謙憔悴泣血謙感其忠壯有申包胥之義許爲出軍岱還而貢已囚其母吳人皆爲危悚岱徑往見貢才辭敏達好自陳謝貢卽出其母孫策聞其善左傳乃自玩讀欲與論講虛已候焉爲媚嫉者所中策遽囚之知友時人皆露坐爲請策

登樓望見數里中填滿惡其得眾心遂遇害

見三國志孫策傳注

晉

顧愷之字長康悅之子博學有才氣嘗為箏賦謂人曰吾賦比嵇康琴不賞者必以後出相遺深識者亦當以高奇見貴桓溫引為參軍溫卒為殷仲堪參軍自荊州假還仲堪借以布帆至破冢遭風與仲堪牋曰地名破冢真破冢而出行人安穩布帆無恙還至荊州人問會稽山川之狀云千巖競秀萬壑爭流草木蒙籠若雲興霞蔚尤善丹青圖寫特妙謝安以為自蒼生以來未之有也或畫人成數年不點目睛曰傳神寫照正在阿堵中

每重嵇康四言詩因為之圖曰手揮五絃易目送歸鴻難圖裴楷象頰上加三毫觀者覺神明殊勝嘗以一廚畫糊題其前寄桓元皆深所珍惜者元發廚後竊其畫而緘閉還之愷之直云妙畫通靈變化而去亦猶人之登仙了無怪色桓溫嘗稱其體中癡點各半故世傳愷之有三絕才絕畫絕癡絕義熙初為散騎常侍卒

晉書有傳

唐

李潛初官渭南尉擢祕書省校書郎乾符四年以宰相鄭畋薦入國史館嘗作惠山寺家山記其文見文苑英華

按輿地碑目李相家山碣條下稱潛為紳孫然宰相世系表紳孫無名潛者攷乘謂紳從孫亦無所據家山記

稱敬元爲濬高祖叔據紳傳敬元紳之高祖是濬乃紳族子耳而世系表則以敬元爲紳曾祖與傳亦不合

宋

杜鎬字文周南唐時舉明經官集賢校理入直澄心堂江南平歷崇文院檢討將祀南郊彗星見宰相趙普問鎬鎬曰當祭而日食猶廢況謫見如此乎迺罷郊累遷國子博士加秘閣校理太宗問西漢賜予悉用黃金而近代爲難得之貨何也鎬曰當是佛事未興故金價甚賤判太常禮院編次館閣書籍會修太祖實錄命鎬檢討故事以備訪問景德初置龍圖閣待制遂以鎬爲之預修冊府元龜拜右諫議大夫龍圖閣直學士班在樞密

直學士下時特置此職儒者榮之大中祥符中同詳定東封儀注累進禮部侍郎卒錄其子渥大理寺丞鎬每檢書戒書吏某事某書在某卷幾行覆之未嘗誤上得古器異書問鎬必手疏本末以聞士大夫訪以古事雖後進卑品應答無倦故士類推之

宋史有傳

袁默字思正父繹字子安以篤學顯默嘉祐八年進士官京兆府教授遷司農簿獻無逸傳歷太學博士遷湖北轉運判官學問淵博士大夫以爲師法弟點

袁點字思與熙寧初太學直講學者推爲領袖與兄默號一二袁元豐八年進士累官通判杭州知淮陽軍點喜佛

無錫金匱縣志 卷二十一 文苑
老書工詩蘇軾以爲有驚心駭目之奇

沈初字子深始入國學試周以宗強賦名第一舉熙寧六年進士元祐中尙詞賦以初此賦及林希佚道使民劉輝堯舜性之陳之方恤民深者饗其樂江衍王道正則百川理五賦頌爲天下格初賦流傳至西夏夏人織以爲文錦官象山尉入爲國子直講

唐作求字叔孝崇寧五年進士徽宗召對稱旨除御筆所禮制局檢討官出知徽州以朝散郎致仕作求學術該敏嚴家訓厲後學唐氏自是以儒雅名家從弟孚字益裕亦以學問遊元祐諸君子間

李端行字正達與弟尙行俱有俊聲同賜大觀三年上舍第爲太學博士高麗遣子入學夷禮不除朝廷病之丞相蔡京會議於學端行曰吾聞用夏變夷彼學夷禮學於其國可矣何用來學宜以國禮繩之遽趣賓贊引高麗士卽日成禮儀注悉裁於端行後以作詩詆蔡京出宰鄞縣發憤丐閒終身遂不復仕尙行字師尹丰神秀偉兄弟同學易日鈔萬言登第後知蕭山縣累遷太常少卿出知信州討平巨盜潘遠趙琦等高宗親書詔命獎諭進直龍圖閣遷江南東道轉運使以言去職尙行與參政張守周葵待制董棻蓋並一時名士

沈松年字性仁大觀三年進士知金壇縣以文學擢太常博士靖康之難丐歸田里有妹適洪皓皓北使妹攜諸甥歸無錫松年教之學皆舉博學宏詞科适爲相遵官樞府邁再入翰林由是三洪名滿天下

錢紳字紳仲大觀三年進士知某州歸別築漆塘山中地有湖山之勝志尙高潔工詩

陳篆字師文紹興十八年進士氣豪邁讀書過目不忘以經學教弟子戴達先幾先兄弟並遊其門

戴達先字子善父滂有文行紹興初建太學達先與弟幾先俱中選士爭傳其文號二戴格以上舍射策賜第高

宗召對擢太學博士孝宗朝求直言達先條天下利害南北戰守事以對召試館職除正字遷校書郎歷知江陰軍移袁州幾先字子微紹興十八年進士嘗官國子司業對便殿論王安石蘇軾之學功利仁義差別上嘉之擢禮部侍郎兼侍講累遷直龍圖閣

呂克成字世德學問精慤與同邑陳篆俱有名兩浙士從遊者常數百人紹興二十四年進士特奏第一仕終蘄州教授

費袞字補之肅孫國子免解進士嘗作梁溪漫志開禧中牒取進御其他著書甚夥

尤棟字率齋年十五已破萬卷景定三年進士除山陽知縣改州教授歷秘書正字出知廣德致仕家貧年至大耋二子壽照皆有文名一時江南郡邑金石碑版皆出其父子之筆

李晦初名燧卿字顯翁咸淳六年鄉薦幼嘗後外家尤氏尤抄書最富故晦得徧讀自經史子集醫卜陰陽算數射覆篆隸真草下至稗官小說釋典道藏無不畢覽家無宿春而好延客忘勢利齊物我自號惠泉散吏

元

尤玘字君玉表六世孫仕元歷官戶部尚書封魏郡公博學多識嘗著萬柳溪邊舊話多述先世遺事

陸介字伯壽穎悟絕人早負文譽薦授平江學道書院山長尋爲崑山教授調信州雅無宦情以諸暨州判致仕范致大字德原工古文詞舉經明行修爲常州路教授陳顯曾字景忠炤曾孫刻苦問學嘗蒐輯其祖生平所作持狀走三千里告於史館至再四而後爲炤立傳顯曾爲文力追古作者至正元年中鄉試官儒學提舉終翰林修撰從子汝霖字伯雨亦以鄉薦歷婺州路教授因變革杜門不出孫尙簡亦有文行

明

張籌字惟史作惟中翼子元至正二十五年江浙鄉試第一

人入明以詹同薦授翰林應奉改禮部主事奉詔編集

漢唐以來藩王事為昭鑑錄洪武九年由員外郎進尙

書與宋濂定諸王妃喪服之制籌記誦淹博在禮曹久

諳於歷代禮文沿革然頗善附會初陶安等定園丘方

澤宗廟社稷諸儀行數年矣至是籌迺更議合社稷為

一壇罷句龍棄配位奉仁祖配饗以明祖社尊而親之

之道遂以社稷與郊廟祀並列上祀識者竊非之已出

為湖廣參政十年坐事罰輸作十二年仍起禮部員外

郎後復官以事免

明史附 崔亮傳

呂敏字志學少貧為黃冠後反服為詩取法漢魏志高心

苦世以呂山人稱之與高啟徐賁諸名士卜居相近號

北郭十友又稱十才子洪武初官本縣教諭十三年舉

明經不知其官所終

明史附 王行傳

錢仲益名允昇以字行幼穎悟長於詩歌洪武中舉明經

為本縣訓導擢太常博士預修高祖實錄進翰林修撰

雅好碁待詔禁垣成祖嘗呼為碁仙後為王府長史自

號錦樹山人年八十一卒於官從父子正子義亦以詩

名

浦源字長源工詩時閩人林鴻論詩以開元天寶為宗高

自期許源聞其名徑踰嶺造之二元請誦所作至雲邊路繞巴山色樹裏河流漢水聲之句歎曰吾家詩也鴻延之入社二元者鴻弟子周元黃元也源亦善畫洪武

中舉求賢科授晉府引禮舍人

明史附林鴻傳

丁信字念誠洪武中舉明經授本縣訓導能詩楊基嘗遊其門同時舉明經為校官者有趙次鈞朱昇馮善次鈞字孟鴻昇字彥昇皆博學能詩善字擇賢嘗纂邑志

王達字達善苦志問學究極羣書金華宋濂甚重之洪武中舉明經為本縣訓導遷大同府學入為國子助教永樂初擢翰林編修預修高祖實錄進侍讀學士充編纂

總裁達有盛名與解縉王偁王璉輩號東南五子及居塞外所學益邃著書曰筆疇亦善畫

大同府志有傳時有余璿

者字彥恆從達遊博學強記舉儒士預修永樂大典璿子文亦有文名

王紱字孟端少為諸生博學工歌詩能書寫山水竹石妙絕一時洪武中坐累戍朔州永樂初用薦以善書供事文淵閣久之除中書舍人紱未仕時隱居九龍山遂自號九龍山人於書法動以古人自期畫不苟作游覽之頃酒酣握筆長廊素壁淋漓霑灑有投金幣購片楮者輒拂袖起勿顧也嘗曰丈夫要審所處輕者若此重者

將何如哉在京師月下聞吹簫聲乘興寫竹石圖且訪其人贈之則估客也客以紅氍毹請再寫一枝爲配絨索前畫裂之而還其餽一日退朝黔國沐晟從後呼其字走及之以畫請絨領之數年晟復以書來始爲作畫旣而曰我畫直遺黔公不可黔公客平仲微者我友也以友故與之俟黔公與求則可耳其介節如此明史有傳

翟宏字宏道永樂中舉明經授齊東教諭調於潛進寧府教諭王甚禮重之宏有家學父時中季父克讓俱能詩子厚字公厚亦世其業

余樞字季樞博而能文爲李時勉所知賞景泰初薦授景陵訓導歷岳陽王府教授楚王府伴讀每於王前申講舉義必有關要

成始終字敬之長身修髯丰神秀爽正統四年進士歷官湖廣按察僉事好爲詩於近體尤工告歸後築室金匱山旁以讀書自娛第二子性工畫見藝術傳性子周進士亦官僉事以風裁稱

劉宏字超遠正統九年舉人歷長垣知縣順天推官東平知州負氣自高視世無足當意爲文奇古政有成績許篪字仲樂正統十年進士歷官戶部員外郎工詩每有作人爭傳之

陳勉字進之正統七年貢入太學歷官工部員外郎以詩畫名尤工大書襟度卓犖見知於李時勉

張九方字應皋景泰元年舉人入胄監授汝寧府推官不畏強禦被誣棄官歸售文自給買舟名浮莊往來湖上擇勝而游或假宿西神僧舍積日忘返其學該博文無凡語自號月林居士

張泰字國泰成化十九年舉人授臨湘知縣有政聲泰爲人高簡才思敏捷畫其餘事學王紱每出畦徑之外邵文莊寶嘗題其水北山莊圖云近來善學孟端畫眼中吾許張臨湘

俞泰字正齋宏治十五年進士歷官給事中山東參政雅好翰墨兼工繪事與信陽何景明善景明題其畫云黃門身在青雲上眼中白雲日南望白雲飛入錫山裏封君之堂應在此俞卿善畫更能賦畫閒青瑣開縑素晴牕落筆白雲生寫出黃門萬里情

秦用中字擇之父璠工詩用中負才名李夢陽何景明諸人與相倡和尤善邊貢以宏治十八年貢授泰順教諭莫止字如山工於詩前人稱其句如天濶一聲何處雁江平千里獨歸舟風致翛然自遠其昭君曲云千年青冢在猶是漢家春尤得風人之旨

錢文字章靖爲諸生累舉不第乃刻意於詩爲文縱橫出入多微詞隱義而詩名特著子百川字東之性曠達亦以詩名

華察字子潛嘉靖五年進士選庶吉士與吳陸粲袁表屠應垓並有才名當軸不喜改戶部主事歷兵部郎中再入爲翰林修撰預修寶訓實錄進侍讀同考會試皇太子立詔諭朝鮮賜一品服充使以行尋以劾罷既而起原官主應天鄉試拜侍讀學士掌南院事乞歸時方清丈田畝鄉里藉其力剗去虛糧六千石括諸蠹蝕豪侵漏科者抵之家本素封林園甲江表而食不三豆室無侍媵文詞清削獨契溟泮察與同邑施漸姚咨善多倡和之作漸字子羽嘗官海鹽丞詩格清迥絕俗咨字潛坤漸子陽得負清節由舉人歷官戶部主事

陳籌字廷猷有文學嘉靖七年歲貢廷試第一除沂州知州歲荒紓民自刻坐馬價弗辦改漢陽教授歸築芹野草堂以讀書終老

王表字邦正嘉靖八年進士選庶吉士改戶部主事乞補南曹便養歷禮部郎中歸念母老致仕表居官僅四載退然與文史爲伍其文典則爾雅悉傳於理通懷樂善鄉里稱之子立道字懋中嘉靖十四年進士官編修有

羸疾鍵戶讀書不事交謁爲詩文博贍婉切五言尤具標格

唐詩字子言志行高潔杜門讀書所爲詩冲和古淡顏其居曰白雲高隱世稱唐山人

俞憲字汝成嘉靖十七年進士除刑部主事出爲紹興同知攝府篆屬邑新昌田賦不均憲差其則爲四輸者便之時巡撫嚴海禁而郡縣遂羅織爲民病憲至悉解其獄再爲南京刑部郎中尋擢江西僉事遷山東參議分守遼陽具著聲績歷官至湖廣按察使乞歸憲好讀書工詩風格蕭雅嘗甄綜有明一代之詩錄而刻之曰盛

明百家詩選

華雲字從龍少師事邵寶又出王守仁之門嘉靖二十年進士會當試館職以親老徑歸三年除戶部主事權稅九江甚著清節改南京兵部進刑部郎中時嚴嵩用事遂乞歸築眞休園萃古法書名畫其中雲素工文辭尤好與當世賢士大夫遊故其一時往來翰墨之富幾甲於江左

孫一元字虞允性孝友嘉靖四十年舉人寄意蕭然有不羈之才爲文辭數千言立就

浦萬里字與鵬世居箭河婁巷父汝舟字利川工詩古文

厭市囂萬里別爲室城西垌侍父觴詠其中有泉東集
高攀龍以通家子數過從歎其晏室靜坐有獨得者子
湛如舉人次子澗如澗如子博士羲升又以文章顯四
世皆能書

安紹芳字懋卿國子生累試不利棄去一意爲詩歌古文
於所居西林羅置圖書彙鼎每四方名流過從置酒刻
燭歌吹間起至忘日夜亦善畫得黃公望法同時有葉
之芳者字茂良以詩名與紹芳遊稱二芳見王世貞西
林記之芳好使酒罵坐亦奇士

吳謙字伯禮父時敏倜儻好施予謙始知學攻苦爲文嘗

戍廣東安遠侯柳溥延置幕下事白歸因號復民有默

菴編年紀行集從子翀字鳳翔有學行嘗重修邑志

華夏字中甫少師事王守仁守仁謫龍場驛夏周旋患難
中歲與吳下文徵明祝允明輩爲性命交搆眞賞齋於
東沙藏三代鼎彝魏晉以來金石縑素品鑒推江東巨
眼徵明爲之銘眞賞齋拓本妙埒宣和停雲快雪而下
不敢望也

顧起經字長濟更字元緯爲從父可學後浸淫墳典從可
學官京師嚴嵩知其才要置直廬屬爲應制之文起經
遂巡謝不能去以國子生謁選授廣東鹽課副提舉兼

署市舶起經素負才氣不能甚下人嵩壻袁生者爲參議奴視其屬起經長揖徑出曰吾尙不爲爾婦翁客而辱鼠子乎少詹事黃佐修廣東西通志起經與黎惟敬歐楨佐之

顧起綸字元言起經弟爲從父可賢後可學挈之京師代爲祝釐應制之文多當上意以國子生授雲南某衛經歷有宦官挾數緹騎以鮑司禮指求金於黔國所過橫甚手批殺驛卒起綸辨非是迺遁去遷鬱林州同知援据葛洪句漏事以正大司農檄徵丹砂之誤旣歸有別墅在惠山寺塘涇富泉石豪於文酒好讀書工古文辭

善書法在滇與楊慎皇甫汈相倡和輯明諸家詩名國雅從子道洪字嗣圖可久孫篤學力行著述甚富其襄陽外編采入四庫書

尤鏗字伯聲瑛子以太學生授邛州判不赴家貧友人爲築雲鴻館以居之窮覽載籍著書甚富弟鈿亦有才豔同時談修負才氣擅著述與鏗皆好詆諆時賢

鄒迪光字彥吉萬曆二年進士授工部主事累官湖廣提學副使擅衡鑒楚士服而歸之以吏議罷送者數千人生祀之濂溪書院迪光旣罷治園亭於惠麓與當世名公卿文士遊宴其中極聲伎觴詠之樂垂三十年有集

無錫金匱縣志 卷二十一
數種合三百餘卷一時聲氣奔轅幾與婁水奔圍後先
狎主文壇子德基字公履負不羈之才工詩文書畫嘗
上疏願以家財三十萬助邊不報好爲驚絕之行爲盜
所殺

顧嘉舜字虞工天啟元年副貢生爲人方嚴有氣骨嘗與
諸友論文有貴人過訪謝弗見其學深於尙書旁通博
覽著有尙書日牋及表異錄馬世奇嘗敘其書以爲學
人非才人也

張韓字幼韓天啟間諸生自少服膺昌黎文故以爲名詩
兼綜陶杜家奇貧不作苦寒語遇高會跌蕩詎翻傾其
座人尤喜讀易有別悟編纂甚夥其自爲詩文曰率無
雜著五卷

華淑字聞修讀書善病有小築曰斷園引客倡和其中於
詩苦心數十年頗隨逐時好而久自淘汰亦別成杼軸
同時呂自咸字誠之亦工詩善書法

周夢華字公西性狷介經學別有心得能古文詞崇禎八
年以貢生選授推官未仕卒

吳寅字虎侯少遊薛敷教鄒期相之門文有奇氣及壯尙
困童子試馬世奇爲之延譽始補弟子員嘗爲詩簡世
奇乞爲文序後江行遇盜死

無錫金匱縣志 卷二十一
馬瑞字爾采父世名與兄世奇齊名天啟元年舉人以薦授知州居鄉里稱長者年八十五卒瑞才華富贍稱其門風崇禎十六年進士除吉水知縣不赴改應天府武教授遷國子博士福王時馬士英頗以同姓招致之拒不報

馬壬玉字彥豐父世奇見忠節傳方世奇官京師一時干謁者眾壬玉杜門以絕几榻蕭然及世奇殉國變壬玉號泣請卹南都日擊馬阮枋國歎曰定鼎門西名利如舊而國家陰陰猶日將暮遂時時寄託詩篇江南亡後一日舟過虎邱疾作卒遺命以沙門服斂後湯文正斌

巡撫江蘇私謚之曰文孝

顧宸字修遠嘉舜子崇禎十二年舉人操文場選柄數十年每辟疆園新本出一懸書林不脛而徧海內好藏書插架充棟後厄於火嘗注杜詩補輯宋文三十卷皆東萊文鑑所未及爲詩文豐蔚典贍子彩字天石有異才尤工詞曲客曲阜製樂府百餘種彩子忠亦工詩

安廣譽字无咎希范子不事繩檢而文采宕逸與弟廣生並工於詩兼善書畫門人張慥亦有名族人夏字大己諸生善詩鼎革時文文肅震孟子乘死夏保其遺孤隱居吳縣之木瀆

秦德滋字以異副貢生名著復社工於詩與華淑黃傳祖輩結涯臻詩社尤善楷法似歐陽率更嘗彙刻前人各種書曰梁溪秦氏帖甚精妙

陳卿茂字碩符諸生弟某字本符

道光續志謂卿茂字本符今從梁溪詩鈔皆

工詩號陳氏二符與顧樞顧杲友善恆以詩相唱和

國朝

邵儒榮字仲木名世子少時文采弼禠所交盡當世名士選伎徵歌無虛日既經兵燹家日落乃閉門著書爲文悉有根柢慈谿姜宸英稱其所爲顧杲傳與陳振豪墓碑得太史公法性至孝尤能急人之難晚逃於禪及卒

宸英志其墓

陳大成字集生少孤發憤讀書家貧雅好客客過梁溪者大成爲之授館舍治行李典衣剝薦日不暇給與邑中嚴繩孫友善其詩豪宕感激爲時所稱

鄒忠倚字于度順治九年進士第一人授修撰忠倚素孝友嘗侍父疾於邑之東亭夜走入城延醫失履而不覺性靜默淡於榮進登第後常翛然有出塵之思故其所爲詩清遠閒放不染垢氛惜不永年而歿

王仁灝字時大孫蘭子以歲貢知連江縣工詩婁東吳偉業序之詩閒婉秀靚麗而不纖清而不薄又王畿字式

九諸生達十世孫與寧都魏禧及邑中顧祖禹交嘗以詩寄鄒溶於獄極悲涼可誦

唐德亮字采臣明季文體踳駁德亮以韓蘇之氣行之應舉之文試輒無前順治九年進士授戶部主事管京糧廳歷員外郎卒於京邸時有繆振光字維揚少負才名與顧宸及德亮輩爲聽社十七子又吳濯時字漢若與德亮善博涉有清才頗傲物

秦日新字映碧歲貢生少與錢肅澗張夏輩善官旌德教諭著有白鹿堂詩具唐人格律宣城施閏章嘗與倡和黃傳祖字心甫正色曾孫好刻苦爲歌詩與其友彭年皆爲竟陵鍾譚之學傳祖嘗甄綜有明一代之詩名之曰扶輪性率易好飲酒晚以貧死年字子川貢生歷官西安府同知同時蔣遵路字路然少好詩亦從事鍾譚已悉焚棄求之漢魏盛唐遂與傳祖議論多不合重交遊結納家故富亦坐是日貧

鄒漪字流綺博學多聞好著述遊婁東吳偉業之門偉業綏寇紀畧半出漪手平生交遊多名士新城王士禎歲暮懷人絕句所謂花時曾過九龍山第二泉邊挹妙顏者也

周宏字子重康熙三年進士第三人授國史院編修仕至

侍講學士應制典冊人推作手己酉主試山西一以先
正法程爲則孫曰萬曰贊並以進士知名曰萬由知縣
改安慶教授工制舉業其弟子多掇科第曰贊由庶吉
士改部位不達而迭主文枋稱得人

顧景文字景行廷文字廷颺樞子兄弟皆以才名景文故
跌宕爲詩具有奇氣廷文善飲時時病酒而景文尤嗜
酒每劇飲必醉廷文顧諫止之然廷文竟先天景文雖
老壽亦窮困弟貞觀

顧貞觀字華封以舉人官秘書院典籍才調清麗尤善填
詞爲人儁爽篤古誼初契吳江吳兆騫兆騫戍寧古塔

貞觀灑涕要言曰必歸季子納蘭成德者與貞觀交而
相國子也雅善兆騫貞觀作金縷曲二詞示成德寄戍
所成德讀之悉力處辨贖緩相國爲之地兆騫卒得生
入關兆騫旣歸言塞外多暴骨貞觀卽募僧心月者斂
金徧歷戰場收瘞之貞觀自少名諫東南慎交社晚搆
積書巖於惠山祖祠之旁著有鱸塘詩一洗綺靡之習
子統鈞字珊公幼聰俊最工五言詩

馬翀字雲翎壬玉子髻髻凝重如成人讀書不待師授抽
視架上帙皆自通解年十餘作遊仙詩數十首有幽詭
奇絕之語長有異才中康熙十一年舉人體弱善病與

其師黃家舒皆篤信釋氏年三十卒家舒見隱逸傳

秦保寅字樂天家富藏書喜賓客蕭山毛姓

後改名奇齡

亡命

時嘗主其家盡取其書而讀之尤善慈谿姜宸英與爲倡和保寅讀書兼綜條貫所爲詩刊落一切獨標清冷中歲棄諸生能醫偶爲人處方輒效崑山葉方藹序其詩稱樂天爲人落落穆穆與之相處塵意俱盡其詩質而實綺癯而實腴從弟泉芳字天乳亦好學能詩

嚴繩孫字蓀友康熙十八年以博學鴻儒薦

召試授翰林院檢討充日講起居注官遷右中允歸繩孫性恬靜旣薦辭不允就試賦一詩而出

仁皇帝識其名遂以布衣入翰林時與秀水朱彝尊吳江潘耒富平李因篤稱四布衣在館纂修明史及平定三逆方畧出典山西試稱得人其讀書不務涉獵案置一編精熟迺易他書文宗范史詳雅有度詩詞婉約深秀獨標神韻工楷書小畫片紙寸縑爲時珍賞子泓留字人宏性尙雅素畧似其父詩蕭澹畫有家法

王國楨字礎臣工詩文與顧祖禹陸楣諸人善講求經世大畧旁通天文地理奇門兵陣之學好飲使氣人多憚之吳三桂嘗辟置幕府察知三桂縱恣多不法辭去後三桂叛以策干總制蔡毓榮謂賊不足平毓榮不能盡

用而僧鐵川者故與有隙構蜚語陷之辭連毓榮後得
釋而毓榮貶死國楨薄遊梁宋間不得志亦死當三桂
跋扈時國楨嘗言彼耽逸樂無遠志嗣子懦朝廷不召
之必不敢動俟其死西蜀永可無患設激之反亦不能
踰洞庭而北後果如其言國楨無子以甥秦子顯爲子
子顯亦奇士

鄒顯吉字黎眉七歲能詩與秦松齡嚴繩孫顧貞觀輩相
推致鍵關湖北草堂甄錄漢魏六朝三唐人集情寄深
遠尤善寫生兼繪山水人物落墨盡妙弟卿森顯文顯
臣皆工詩畫卿森字衡湘豈弟樂易人稱長者學士升

恆侍郎一桂父也顯吉子士夔士荀士隨並知名士隨
進士歷肇慶知府時有張應元者與士隨同舉於鄉任
舒城教諭亦能詩

華長發字商原諸生工詩詞與秦沅善二人嘗偕顧祖禹
同纂方輿紀要沅字湘侯亦名士與寧都魏禧交沅子
桌從祖禹遊工篆法著有篆刻簡一書禧爲之序長發
尤工行草楷法邑人稱孫高嚴華孫竑禾高世泰嚴繩
孫及長發也竑禾初師率更晚用虞法矩矱森然爲時
第一

劉雷恆字震修以貢爲本府訓導遷六安州文行著大江

南北間弟霖恆字沛遠時稱二劉三施三施者國琮字
睂堅夔宣字儷清京字青蓮風流文采並爲時所推
王志寧字用康長洲籍歲貢生內行醅篤資館穀廩餼以
給養其爲教有根柢從授學取青紫者數十人官青陽
訓導子雲錦康熙四十五年進士第一人官修撰督學
陝西以經術造士關中人始知嚮學

陳瑞聲字朝階振豪子爲詩多楚調居與嚴繩孫鄰論詩
輒斷斷而爭亦復互相推服少爲貴公子豪宕自喜中
年侘傺矢志其無聊不平之氣一寓於詩方秦松齡從
軍荆襄招瑞聲同往所至登臨弔古詩愈悲壯可誦

華章慶字叔延諸生以教習得教職與太倉吳偉業嘉興
曹溶同邑秦松齡相往還爲詩極夥有九龍山人全集
黃瑚字夏蓀爲文惡賈古主中唐北宋尤深於史遷少時
名著雲門社其所作張春傳睢州湯斌亟稱之時邑中
多好古之士而以文名家者無如瑚婁東吳偉業嘗延
之至家康熙十七年屬舉博學鴻儒崑山葉方藹以瑚
名上徵書下病厲不行尋卒無子年僅三十有四其外
兄華學泉輯瑚遺文陸楣爲之序瑚友侯麟勳工詩古
文辭中康熙十八年進士未授官卒

陸楣字紫宸幼孤露讀書雞棲豚柵旁志意感慨喜爲古

文辭同邑朱旂見楫所作延譽於秦松齡得縱觀秦氏藏書自是北走燕趙南踰閩嶠其學益進楫於六經皆有撰述垂老作古今官制考未成而歿楫巨肩曷鼻不知者以為河朔傖父也及門楊聲字清寧畧能具體先楫卒

敖嚙字山來吳縣籍諸生胸羅羣籍為文章手出機杼掉鞅同聲慎交兩社間一時有繡口錦心銅筋鐵骨之目然厄於遇子汾清江知縣

孫祁雍字李若繼皋元孫年十二能文與高愈劉齊善祁雍為諸生擅才名五十年尚書張廷樞以茂異薦有

旨徵召謝病尋卒吳之枚王繩曾皆其高足弟子

黃澐字維觀詩工古體嘗效李東陽作擬古樂府百首雜之懷麓堂集中人莫能辨

安璿字孟公廣居子好讀書工詩所至皆有畱題多識前朝遺事晚更研心理學所著書十數種亦善畫曾孫經傳諸生攻苦力學早歿子舉人吉刻其遺藁

許表被字天章少為諸生短小矯捷氣陵其曹偶研精詩禮春秋尤長於史學晚成一書曰諸史詠

黃炎字炎孫父東山少應童子試嘗於學使者案旁奏七藝一表獲雋炎亦天才秀挺少工時藝及詩歌古文辭

而年至四十始爲諸生尋歿

顧仁垣字中以景文子諸生刻意爲詩沈博絕麗不及其父而法律精細則過之口滑稽能令滿座鼓掌遺橐若干卷其遊梁草及倚聲諸作具饒風調尤爲時傳誦

朱襄字贊皇諸生嘗與邑中呂莊頤鮑景先輩爲詩會曰續碧山吟又著有易韋蕭山毛奇齡序之秀水朱彝尊稱其立說皆本漢以前不墮陳圖南邵堯夫窠臼

呂高培字柏庭康熙中隨嵇永福客蔡毓榮幕吳三桂平由楚入滇以軍功任米脂知縣丁母艱起補隴西罷歸高培詩宗香山眉山碑版之文得廬陵意度家本貧自罷隴西益無繆以窮死浦乃恆字立方永福壻也亦同從軍官止福清縣丞詩詞溫潤

王一元字晚仙康熙四十二年進士授靈臺知縣好爲詩兼工大小令所著凡五十餘卷

秦靖然字藥師少爲諸生以帖括聞於時與吳門汪份張大受交善其文出入金陳諸名家康熙五十一年進士選庶吉士授編修尋告歸屏居讀書時秦氏兄弟多能文章道然靖然辰燕曾榮其尤也靖然繼道然入翰林而辰燕曾榮皆以諸生終

邵曾訓字衷彝幼工詩爲名諸生書法入右軍之奧同時

寓公王澍蔣衡輩俱推之好登覽遇佳山水輒有終焉之志其意興所到一寓諸詩子之鵬諸生亦工書之鵬孫辰煥亦諸生善爲詩尤工五言

徐珽字紫長康熙四十二年珽以布衣獻詩賦選爲蕉園教習校勘秘書久之以勞授光祿寺署正雍正間改授德清知縣尋罷珽才名最盛顧爲外吏坎壈不得志子梁棟字宗海以進士歷官辰州同知亦善詩工書法杜詔字紫綸少從嚴繩孫顧貞觀遊得其指授工於詩尤善填詞康熙四十四年詔獻迎

鑿詞十二章於

行在試列高等

命入內廷纂歷代詩餘方輿攷畧及詞譜五十年舉順天鄉試明年

賜進士改庶吉士尋乞假歸卜居南垞以詩倡導後進雍正十三年大學士嵇曾筠以博學鴻詞薦辭不赴時秦莘田吳培源皆學詩於詔莘田培源後先成進士培源詩格清整有刊本

呂簡材字丹錄幼質魯苦讀不倦年逾二十貫蘇籍爲諸生海昌陳元龍嘗延至京師訓其子邦直病歸遽卒生平所著詩文四五巨冊皆散逸浦起龍少從受業其學

多得之簡材

張文耀字元明九歲知操筆為文章稍長補諸生其為制舉文宗法唐順之歸有光日手一編曰二川風格晚除天長訓導以老不行同時諸生王起祚字廣韶從金敞顧培諸人游為文根極理要工小楷惜年不永

倪坊字文繩諸生家貧好學肆力六經注疏及史班范諸書弟子問字者集其門孳孳教誨不倦又嚴元桂字丹森負志節有詩癖亦能古文自號宋家山人

邵煥字振飛幼擅才名工辭賦困於諸生詩格近襄陽柳州其從弟覺字梁夫亦工詩煥與華龍翔陸慶元吳培

源為詩友稱四子

華龍翔字丕光父黃字備大康熙十八年進士嘗以戶刑曹郎與修律例出知永平府官吏不能欺龍翔國子生工為詩歌行長句出入韓蘇

鄒升恆字泰和卿森子康熙五十七年進士選庶吉士館試第一授編修歷官侍講學士直著作之庭累職文柄文尚體要詩冲和淵永以標格勝督河南學時疏請追謚舊儒臣睢州湯斌又請著出嗣子遇本生父母喪停官停考一年之令並得

旨允行

王史直字子擎弟史鑑字子任俱好學能文熟於舊聞軼事嘗輯無錫文獻各爲一集尙書任蘭枝爲之序秦望字元功諸生精究易學旁及天文地理作思通集兼善醫著有醫源八卷

王邦采字貽六諸生中歲棄舉子業覃精六經淹該史學好爲詩古文辭尤工於畫跌宕超逸入古人妙境精別金石縑素南北宋雕鏤版本吳興賈人接踵就辨真贋又喜箋注前人遺編如徐節孝晁具茨吳淵穎諸集而離騷更別有解會云

徐漢倬字鳴皋諸生澹於進取喜購書詩擬襄陽詞仿玉田清迥不染塵滓爲人謙退冲夷與之處矜躁都化事親孝父歿以哀毀卒年僅三十七

劉瞻榕字于根父學洙有學行與劉齊同爲桐城方苞之友康熙三十九年進士謁選歿於都門瞻榕持終身喪一素帶常不解曰死以此束我瞻榕深於詩冲澹淵穆如入禪定子執玉亦工詩邑中學詩者多從之遊

俞玉局字爻心拔貢生偉貌修髯讀書過目成誦學詩於顧仁垣性孤介居京師十餘年意所不可雖公卿造廬輒拒弗納父履道客死苕溪玉局以弗克視含斂爲終身恨歿時斥子孫去左右其友鄒乾樞亦拔貢生同學

集錄金匱縣志卷二十一
詩於仁垣記聞博洽尤熟於舊聞軼事玉局孫模諸生
能詩布衣糲食閉門忍饑亦狷士也

浦起龍字二田雍正八年進士官蘇州府教授起龍居邑
之前礪肆力於古於書靡不窺丹黃甲乙積數十年從
學者質問經史輒舉某書某卷某頁以告檢之無不合
其爲文學唐人諸雜家所著讀杜心解

御選唐宋詩醇多采其語官教授時青浦王昶嘉定錢大
昕王鳴盛輩方爲諸生並遊其門

朱克敏字若愚布衣居城南讀書苦吟詩寒瘦似郊島少
雄於貲晚而貧至不能給饘粥兩目亦盲其死也鄰人

斂之克敏與邑中惠雲邵燮崑山徐德宗稱四狂皆能
詩燮最後死時有陳倫字子循工七言古詩

華玉涪字師道諸生爲學窮研經史務究根柢顧棟高春
秋大事表一書資玉涪討論之力浦起龍讀杜心解成
玉涪致書多所辨駁起龍無以難也曾欲撰述八書以
補三通所未備未成而歿其古文亦具有義法不苟作
弟育濂字師茂從棟高遊治經學從弟嶽蓮字師實與
邑人黃中並以詩名中字包山

趙繼光字夔陽博涉羣籍稗官野乘靡不搜采尤好爲詩
歌嘗遊燕趙吳越之墟轆軻無所遇酒闌燈炮輒以詩

抒其抑鬱邑中詩人如朱克敏劉執玉繼光皆與之友
有兄繼益亦能詩

秦鄰洛字大來寄籍吳縣中康熙五十三年順天舉人務
有用之學治河營田兵法靡不通曉當路欲羅致之遽
束裝歸遂不應禮部試晚涉佛老並通奇門占驗諸書
楊度汪字若干拔貢生篤志問學尤工學窠書膺薦入京
師客舉主尚書任蘭枝邸舍得交山陰胡天游天台齊
召南學益進既中博學鴻詞科官庶常尋改德興知縣
告歸同時鄒有譽乾隆四年進士授隆德知縣有譽長
於記問史漢八家之文及李杜詩皆能背誦爲諸生時
爲人捉刀文多借刻他氏

王會汾字蓀服乾隆二年進士改庶吉士歷官吏部侍郎
終大理寺卿會汾少刻苦下帷雅負文譽雍正十三年
舉博學鴻詞報罷泊入翰林

御試翰詹第一不數年洊陟卿貳充明史綱目副總裁先
是總裁周學健纂明綱目前編會汾奏元綱目終於順
帝二十七年今斷自洪武元年宜與至正二十八年兩
行分注於甲子之下入洪武二年始將明祖年號大書
不必創立前編且前編所載已見元綱目請削去

上從之又以原纂洪武一朝之書旁摭稗說不合體裁建

文以後又多失中乃詳覈史文重加編纂遇京察舉齊
召南自代居官廉潔其歿也門人梁同書經紀其喪

楊潮觀字宏度父孝元諸生殖學砥行出後世父希曾希
曾工詩文楷法康熙中獻詩

行在蒙錄用供奉武英殿補諸生遽歿潮觀乾隆元年舉
人除林縣知縣移固始性和易而爲政廉敏有聲人稱
爲楊固始擢邛州知州調簡州瀘州告歸潮觀幼擅才
華兼工書法平生雅好著述以餘技爲吟風閣傳奇錢
唐袁枚演之金陵隨園一座傾倒

秦鈞儀字伯芳拔貢生善談論掀髯抵掌旁若無人以能
經義稱詩古文具體裁學使寧化雷鉉亟稱之年六
十餘遊楚歿於襄陽

華純曾字敬思乾隆三年舉人授常熟教諭學問淹貫主
講貴州多所造就其文宗法歸胡兼善詩同時鄧愷以
副貢生爲旌德教諭事繼母以孝聞亦能詩

沈金鰲字芊綠貢生從華希閔治詩經尙書從秦蕙田治
易從顧棟高治春秋數年窮一經各有著述其尙書隨
筆采入四庫書晚潛心醫學著有沈氏尊生書

顧奎光字星五宸曾孫博學多識詩古文俱有名於時乾
隆十年進士歷瀘溪桑植知縣愛民養士頗著循績年

無錫金匱縣志 卷二十一
四十卒於官所著然疑錄春秋隨筆采入四庫書湖南通志
有弟斗光諸生亦負才華

秦朝鈺字大樽乾隆十三年進士由禮部郎中出爲楚雄知府朝鈺胸無柴棘唼於口而丰裁峻厲人不可干以私官楚雄日屬有兵事朝鈺辦治井井兵過而民不知一日巡撫過境朝鈺方讀書廨中之山亭迨終卷出城不及趨謁巡撫聞其賢亦不怪也繼以左遷歸朝鈺工於詩其集顧光旭刻之尤善治古文多可傳者

黃印字堯谷家貧力學以教授生徒自給注釋諸經而尤深於易乾隆庚午修縣志印別成識小錄一名酌泉錄於邑中掌故多所辨正印嘗應乾隆六年鄉試其文見賞於主試臨川李紱已魁其本房爲副主試所斥而同邑龔錫純以是科爲省元錫純字侯復平日專心著述其學尤深於三禮稍後有諸葛曦名未出里巷閉門讀易著有周易義政一書

薛田玉字鳳翼乾隆十七年以大興籍中順天鄉試第一十九年成進士選庶吉士散館改知棗陽縣遷保定同知田玉少有文名擅才藻嘗教授鄉里從游頗盛

吳峻字一峯鷓子副貢生姿稟絕人博通律呂句股之學詩兼眾體上溯漢魏迄於三唐無不窺其堂奧尤以風

格音調擅場同時作者未能或之先也嘗偕寧遠知府秦鑽入蜀詩益奇其友鮑汀輒取其句圖之汀字若洲諸生工詩及書畫峻又善李維來其詩五律近王孟朱雲駿字逸湄乾隆二十一年舉人官隆昌知縣少學詩於劉瞻榕入蜀後篇什尤富古文學曾鞏在隆昌時方有金川軍事饋饟供億不以擾民竟以勞瘁卒官雲駿之友曰華文緯陳凱並諸生文緯善治經及顧棟高之門凱工詩二人皆早歿

諸洛字杏程諸生少學古文於秦道然顧棟高旣而交徐流方得桐城方氏義法文益進嘗遊京師名頗著公卿間晚年杜門著述藏書甚富皆手定流方字玉川嘗從王澍蔣衡學書棄去一注意於詩有晉魏風繼客漕督長白顧琮所因得師事方苞并治古文時有舉人鄒方鏗與洛善亦善爲散體文字行楷書尤工

劉松苓字思九國子生少時與顧光旭鮑汀友善光旭早達汀老於諸生而松苓落魄軼軻得狂疾竟以狂死松苓詩才奇肆工小賦所爲詞兼有辛蘇姜史之長居西郭外人皆目爲城西狂生云

王廷範字斂齋貢生少有異才於性理經史多所發明尤工制藝選東臺訓導奉檄查賑足繭荒山中晚歸病瞽

從學者咸口授之

潘望齡字璜溪乾隆三十年拔貢生景山教習陳文恭宏謀將以經學薦會丁母憂止厯主泰州六合講席從學以百數年踰八十問業猶滿戶外子本郊十歲能屬文舉於鄉以父老不仕授徒自給講求實學

黃世則字正衡國子生嗜吟詠手集邑人詩曰梁溪詩匯山陬水湄敗笥敝篋中靡不窮搜後以其橐歸顧光旭光旭輯梁溪詩鈔多取焉同時周鎮字漢冲亦工詩

楊芳燦字蓉裳乾隆四十二年拔貢生

廷試一等知伏羌縣值回民田五滋事圍伏羌芳燦誅內

應數人城守五晝夜援至圍解擢知靈州尋入貲爲戶部員外郎與修會典丁母憂歸主講關中旋修四川通志卒於蜀芳燦工詩及駢儷文才豔絕一時與同郡洪亮吉孫星衍同邑顧敏恆齊名守伏羌時按察使王昶賦詩飛達圍城芳燦援筆和之其整暇如此子夔生以雄縣丞累擢知薊州亦有才藻尤長於填詞

秦鼎雲字汾祥勇均子乾隆四十二年拔貢生爲如皋教諭常集課諸生與邑人徐觀政等爲詩社宋王學士觀墓爲豪僧所侵鼎雲力言於上官復其地又得詩人邵潛夫墓碣於他所訪而復之卒於官祀之學宮旁舍鼎

雲好古博覽藏書甚富鼎彝書畫無不精審又喜談兵
著有慎戰慎守編見聞隨筆錄

顧敏恆字立方奎光子乾隆五十二年進士天才俊拔嘗
游貴池撰昭明太子廟碑錢塘袁枚見之拊掌曰此文
令我懷疑十年今得之矣任蘇州教授弟敦愉敬恂敷
憲皆工詩楊揆合刻其兄弟四人詩爲辟疆園遺集

蔣起元字善長諸生專攻經學殫數十年精力輯

御纂周易述義詩義折中春秋直解三書義疏窮搜博採
一書皆數百卷同時鮑榮字戟門起元著義疏常與往
復駁議著有易經傳義約言

秦鳴雷字震宇諸生善治經兼通性理私淑外祖王繩曾
弱冠遭疾枯坐玩易經年學大進著有易玩讀易質疑
書質疑詩測詩存春秋抱遺禮液周官粹義瑤石山房
詩文鈔史雋等書

楊掄字方叔少有文譽中乾隆四十三年進士知浙江太
平縣著有春草軒詩弟摺字蘊叔能詩文四川教匪滋
事大將軍福康安延佐幕府事平論功辭不就

安吉字彙占乾隆四十四年舉人操行端潔閉戶窮經兼
深音學以叶韻爲非謂韻有古今無所用叶生平著述
頗富夏時考韻徵一書尤其心力所萃也子念祖亦著

有古韻溯源等書

許庭堅字次谷恩貢生父卓然藏書萬卷庭堅枕藉其中
詩文縉幽鑿險迴絕恆蹊工山水秀逸天成著有忍古
齋詩文集鄒岳字舜咨國子生工詩善音律尤長考訂
楊琴度汪子國子生以能詩名性伉直于文襄敏中以年
家誼招致謝不往乾隆四十五年

臨雍獻頌

賜銀兩宮綢著有賜硯齋詩從子抃優貢生能詩文

侯鳳苞字舜威乾隆四十八年舉人官寶應教諭前明鄉
賢華允謀嘗爲是官鳳苞因構景燕齋以課士以允謀

號燕超故也鳳苞篤學至老不倦從游甚眾著有洗心
齋詩文史論汲古綆等書弟鳳芝鳳蘭族子士穀並有
文學

高雅壘字殿英湯泉字澗南俱乾隆五十一年舉人爲邑
名師泉少力學致左目失明中式後以母老未與會試
雅壘從江筠受經學工書官靈壁教諭

吳駟字與驂乾隆五十一年舉人通經學尤邃於易著有
易括易解彙要等書子雲諸生能世其學

華榕端字蔭楠乾隆五十四年進士知范縣罷歸家居三
十年杜門讀書當道罕識其面子光燮諸生著百一草

吳邦基字諤庭乾隆五十三年舉人工詩文久客京師著大禮考未就卒

薛玉堂字又洲祖景珏見流寓傳玉堂少能文善書中乾隆六十年進士授中書出爲廬州同知時和州旱民欲鑿淖河利灌溉紳士沮之玉堂奉檄往勘以開河請民便焉歷官慶陽知府以疾歸載書數千卷閉關卻埽足迹不入城市年七十九卒時有薛一飛者爲諸生有聲又玉堂弟子朱培年亦諸生通小學

秦永年字雪觚貢生署奉賢訓導江北饑民南徙永年奉檄勸賑流民無失所者著有碧梧桐館詩集族弟玉海字步三貢生爲邑名師著有擁書樓集永年孫炳文字誼亭舉人官吳江教諭晚入貲爲戶部主事居京師久以善畫山水擅名於時

鄒印綬字錫桓乾隆五十七年舉人任六合教諭其俗攻擊荒籍考試印綬除其弊再補興化奉檄勸賑胥吏無欺冒民德之印綬少孤力學著有天香閣詩文鈔

顧皋字晴芬嘉慶六年進士第一人授修撰累掌文衡官至戶部左侍郎引疾歸皋天性和易居官清介宦歸閉戶蕭然當道罕見其面善寫蘭竹詩文高雅如其爲人弟爽諸生能詩咸豐十年死難年七十六

徐煥字舫亭嘉慶六年進士歷官禮部主事少治儀禮嘗
作朱子釋宮圖證闢堂前方丈地導諸生進退揖讓其
間王公子弟多執經門下座師朱文正珪題其楹曰先
生畫堵同綿蕞弟子傳經半繡衣都人傳誦之煥爲人
坦直樂易爲古文質樸無華飾著有舫亭集

鄒植行字禮畊嘉慶十年進士授編修充實錄館纂修夙
夜勤慎旋擢司業屢遷左庶子出爲山西學政所拔皆
知名士

秦大受字可廷諸生邃於性理易學諸書發爲文深入理
窟晚游廣東著有粵中吟草讀史遺編弟大光字麗中
由舉人歷官睢州知州有政聲著有楞香詩草秦瀛重
修邑志大光獨贊之

秦大雯字霆章嘉慶九年舉人攻苦力學著春秋人名考
異弟大霖字懋學歲貢生淡於進取著詩義尊聞
施晉字錫蕃諸生性高曠於世無將迎工詩初盡力於六
朝諸集後以老杜爲宗格調神韻獨擅一時凡幕遊所
至登山臨水佳構極多著有一枝軒橐

王焜字耀華嘉慶十二年舉人讀書過目成誦終身不忘
幼與劉嗣綰稱兩神童壯歲博覽經史爲文益工選授
通州學正未赴任卒子禮甲字晴耕貢生詞賦敏妙而

落拓不羈著有靈蘭館詩鈔

吳寶書字松厓國子生省曾子著有桐華樓詩詞又善畫

梅竹同時吳瑗字雲侍亦能詩工書

王鳳岐字巢谷諸生詩文有風格尤工駢體著有紹裘堂

詩彙駢儷碎金其友杜解字遠峯諸生詩有奇氣

孫廷鎬字蓮峯諸生工詩文著有白紵集熟於史事喜談

兵從游者諸生韓芸章優貢生馬燦皆能詩燦子錫初

亦諸生績學能文早卒

周暲字篠麓諸生博覽強記性耽吟咏注李青蓮集十餘

年始成同時華白字素人詩宗王孟賈季超字雲莊能

詩工畫蘭丁禾字湛之諸生詩文有奇氣

汪士侃字寫阮嘉慶十四年進士知雙流縣入貲爲工部

員外郎性耽讀書研究經術改官時以俸錢買書數千

卷寢饋不離尤精於氏族之學邑中著姓均能道其所

自出有其子孫所不能知者卒年八十餘子望求舉人

亦博學能文

顧翰字蕪塘敏恆子少承家學詩才清絕人品狷潔如其

詩嘉慶十五年舉人知含山涇等縣晚歲主講東林書

院粵匪之亂受傷而歿祀涇縣名宦弟筠蕙生並有才

蕙生又善畫從弟翊字南厓官昭文訓導詩學玉溪生

顧氏自奎光後子孫昆弟能詩者數世風流文采爲時所稱

楊紹基字桂巖諸生幼孤力學受業孫文靖爾準之門詩文軼宕有奇氣著有况梅齋詩官蘇州府教授丹徒訓導子延俊字菊仙以進士知肥城縣工制舉文在肥城嘗修書院以造士

章簡原名程字芝楣道光元年舉人少家貧勤學苦無書館於秦文恭蕙田故第讀其所藏書幾徧故博雅冠一時工辭賦駢體妙筆札兼善弈游公卿間往往以弈掩其文名云著有讀史質疑注疏辨正思誤齋詩鈔同時

安詩字芝慶館侍郎秦瀛家詩文得瀛法以進士歷官吏科給事中有飛香圃詩鈔又有吳培蓀字竹坪亦舉人能詩

唐汝翼字鷺廷道光十二年舉人博學能文研究天官家言及韜鈴奇王太乙諸家靡不通曉咸豐三年粵匪踞金陵邑人遷徙汝翼謂無恐惟庚辛年當有變條陳團練戰守事宜上書當事不報後其言皆驗

丁彥和字暢之國子生以駢體爲林文忠則徐所知居其幕最久性嗜古畜金石陶器富而精雖屢空人以兼金易之不予也粵匪之亂彥和病廢不能徙全家遘難

周有壬字佩安國子生自幼棄舉業橐筆游公卿間數十年於邑中文獻掌故考求甚力斷碑隻字靡不搜訪編錄梁溪文鈔凡八十卷又著錫金考乘補證邑志爲多其次女毓芳適秦賡彤有壬卒毓芳收集父書勤護之考乘十四卷則其病革時出私橐金所刊也

鄒導源字蓉垞諸生博學工文覃精經術嘉慶十八年省試主司賞其文已置魁選而導源未終場輒棄去性堅僻不諧於俗著有古桐書屋詩古文以王介甫曾子固爲宗導源卒鄒壯節鳴鶴爲梓其遺橐

華湛恩字孟超諸生官太和縣教諭藏書數萬卷熟於邑

中掌故著錫金志外一書先是邑沿前明弊政有現年之役道光丁酉戊戌間議除之卒爲奸胥所格湛恩痛發其事臚著於篇後鄒壯節鳴鶴因之而弊以革是書實爲之張本云

鄒安鬯字敬甫歲貢生爲文高簡試輒不利喜讀性理書治三禮通算學嘗用鄉賢顧棟高法習儀禮於棋枰一時問業者頗眾又以善書爲里塾師家貧飲酒鼓琴怡然自得其友宣力字少能諸生亦通漢學又諸生丁彥超國子生張鴻文皆以習算師安鬯彥超簡默善思後其學益進安鬯轉以叩焉兩生嘗同參立天元一至徹

夜不寐安密謂鴻文深思不如彥超而穎悟過之惜早卒彥超兼善弈亦不壽

薛沆字子憲原名汪度父錦堂諸生著經說標異等書沆治經精小學以諸生爲邑名師學使祁文端竊藻巡撫林文忠則徐皆深器之然竟不遇晚遭粵匪之亂走投學宮前河浮沈數里不死其子福棿則遇賊見害焉逾年沆卒著有經義備考讀史正氣綱維錄福棿亦諸生博學有才氣

薛湘字曉颿沆弟道光二十五年進士知安福縣咸豐四年五月粵賊連陷常德澧州安福實介其衝湘料民集

丁壯擊敗悍賊曾天養於鼇山市調新甯與縣人劉坤一江忠濬等戮力防守賊不敢犯擢知潯州府縣人乞留未受代去卒湘於學無所不窺著有說文段氏翼末兩齋詩古文其制舉文孤出一體天下爭相模倣

沈瑩字晴庚諸生能詩精篆刻尤工倚聲有留鷗吟館詞嘗與吳江郭麐元和戈載同客清江浦郭故善爲詞戈深於音律瑩詞學蓋得諸二人云同時虞文雄字健資亦諸生工詩惜早卒

張岳駿字端甫諸生少工詞章雅喜側豔後從上元梅曾亮游得古文義法自是悉變其所爲數年學益進然竟

輓珂卒於京師年三十五其友侯楨秦緗業刻其遺藁
曾亮爲之序

侯楨字子勤道光二十六年舉人博通經史方輿水利諸
書無所不究善爲詩古文辭與張岳駿同師事梅曾亮
於京師既歸益肆力於學著述甚富粵匪之亂再投水
不死困頓逾年而卒同時湯天麟字石民與楨善亦工
詩

張步瀛字蓮洲少工詩賦及制舉文爲邑名師以拔貢生
中式道光二十四年副貢步瀛治經通歷算嘗謂本朝
經學直接漢唐宋以後所不逮算學直接三代又漢唐
所不逮也晚年專心六書病畢沅釋名疏證闕畧因作
重箋又爲釋名求音未竟而卒著有醉墨軒詩鈔

錢勛字揆初咸豐五年順天舉人勛少負才名厭舉業著
爲詩歌駢儷文辭沈博絕麗類吳偉業楊芳燦之倫同
治初巡撫李鴻章統師上海勛以內閣中書參其幕累
薦以知府用後從勦捻匪得疾卒於濟南贈太僕寺卿
蔭一子知縣有張嗣平者與勛友善勛嘗延嗣平主其
家共著 國朝詩話商

杜友韋字仲容咸豐元年順天舉人工詩署陽江知縣尋
卒朱蔭培貢生善筆札亦治古文有澹庵文存客死濟

南

無錫金匱縣志卷二十二終

無錫金匱縣志卷二十三

忠節

處天下之變而致命當國事之失而極言不可謂人臣
 之幸而天地之正氣萃焉若虞俊以下諸賢既各炳乎
 史乘而李忠定尤以忠直暴著寰區迄乎有明氣節彌
 厲士爭慷慨言事自是蓋少衰矣豈以時際其隆歟抑
 風會為之也然自粵逆構難或殉疆土或捍鄉閭斷脰
 捐軀者至不可勝數又何其烈也豪傑之士固在乎自
 命哉志忠節第二十五

漢

虞俊字仲卿少以孝友稱於鄉黨明春秋公羊左氏傳哀
帝時爲御史稍遷丞相司直王莽執政左遷新陂令尋
召爲司徒俊欲遁歸遂見迫脅仰天歎曰吾漢人也願
爲漢鬼不能事兩姓飲藥而卒光武卽位高其節行與
二龔比爲表塋墓

〔南唐〕

陳喬字子喬廬陵人徙居無錫仕南唐爲太常寺奉禮郎
烈宗頗器重之遷尙書郎拜中書舍人元宗旣失淮甸
恥其降號將授幾務於太弟而陳覺之徒因有窺竊之
計欲委國事於宋齊邱而取之喬排闥入諫元宗驚悟
乃止於是引喬入見后及諸子指曰此忠臣也他日國
家有急汝母子可託之及元宗南遷留喬輔太子監國
後主卽位遷吏部侍郎翰林學士承旨門下侍郎兼樞
密使遂總軍國事宋開寶中太祖遣使召後主入朝後
主欲行喬曰陛下與臣俱受先帝顧命委以社稷今往
而見留則國非已有悔將何及後主於是連年拒命實
喬爲之謀也及城陷後主自爲降款俾喬與世子仲寓
開門納之喬遽歸府投款於承霽後主促之亟喬入見
曰自古豈有不亡之國降無益也臣謂宜城下一戰而
死後主執喬手曰盍與我北歸喬曰臣當大政而致國

家如此非死無以報臣死而歸臣以逆命之罪陛下可無恙也掣手而去入政事堂自縊死吏撤榻瘞之後宋太祖命以禮改葬焉

南唐書有傳

宋

錢顓字安道慶曆六年進士爲寧海軍節度推官守孫沔以威嚴爲治僚屬奔走聽命顓當官而行無所回撓獨見器重治平末召爲御史裏行王安石行新法宰臣曾公亮依違不言顓疏安石談堯舜以致公輔首財利以爲容悅言行乖戾公亮畏避固寵非是貶監衢州鹽稅將出臺謂同列孫昌齡曰君奴事安石得御史自以爲得計卽我視君大篋之不若也拂衣上馬而去後徙秀州家貧母老至丐貸親舊以給朝餽而怡然無謫官之色蘇軾遺以詩有烏府先生鐵作肝之句世因呼鐵肝御史

宋史有傳

袁植字材老兄默點在文苑傳植崇寧二年進士復中詞學兼茂科官監察御史金人入寇陳邊防十三事以誅佞人爲先不納引疾致仕建炎初召爲左司諫直言忤宰相出守岳州會北騎大入叛臣李允文據鄂州大剽荆湖植條其姦上之允文中路得遞疏怒勒兵趨岳陽執植植正色詆之不少懼遂見害於武昌事聞追贈直

龍圖閣錄其後二人

李綱字伯紀邵武人自其祖賡始居無錫父夔龍圖閣直待制綱政和二年進士積官至殿中御史忤權貴遷起居郎宣和初京師大水疏言陰氣太盛當憂外患謫監沙縣稅務七年起爲太常少卿金人渝盟朝議避敵綱上禦戎五策欽宗卽位上言中原勢弱陛下履位之初當攘除外患誅鋤內姦以副太上付託之意召對延和殿奏今李鄴等議割地臣愚以爲祖宗疆土當以死守不當以尺寸與人上以爲然除兵部侍郎宰執議避敵鋒綱言太上手挈宗社以付陛下委而去之不可白時

中謂都城不可守綱曰天下城池豈復有如京都者且宗廟社稷百官萬民所在舍此何之惟當整飭軍馬固結民心堅守以待勤王之師上意稍悟內侍奏中宮已行上色變降榻曰朕不能留綱泣拜以死邀之上顧曰今爲卿勉留未幾復決意南狩入朝則乘輿已駕禁衛皆擐甲以待綱急呼語之曰爾等願守宗社乎從幸乎應曰願死守入見曰陛下已許臣留復戒行何也今六軍父母妻子皆在都城萬一中道潰歸陛下孰與爲衛且敵兵已逼知乘輿未遠使輕騎疾追何以禦之上乃悟遂命輟行綱傳旨敢復言去者斬拜爲親征行營使

無錫金匱縣志 卷二十三
四
以便宜從事迺治守戰之具數日而畢敵兵攻城綱身督戰募壯士縋城下斬敵將十餘人衆數千級敵退上遣李悅至軍中議和金人需金幣千萬求割太原中山河間以親王宰相爲質悅懦不措一辭還報綱言所需金幣竭天下且不足矧三鎮屏蔽割之何以立國至遣質則親王不當往宜遣使與之議遲留數日大兵四集雖不得所欲亦退卽許之盟不令輕中國與宰執議不合甫退則誓書已行所求悉與綱遂奏金人貪婪兇悖今以孤軍深入若阨河津絕饑道分兵復畿北諸邑以重兵臨敵堅壁勿戰俟其食盡力疲以一檄取誓書復

三鎮縱其北歸半渡而擊之此必勝之計也上命約日舉事有姚平仲者勇而寡謀先期斫敵營不克亡去金使來宰相歸罪於綱遂罷綱太學生陳東等伏闕請留及軍民集者數萬上急召綱入復其右丞金師退除知樞密院事請如澶淵故事遣兵十萬分道護送遇可擊則擊之宰相咎綱盡遣城下兵復詔徵還已追及邢趙間遽得命諸將皆扼腕比綱知力爭已無及矣初太上南幸童貫高俅以兵扈從流言且爲變議遣聶山圖之綱曰使山圖成震驚太上憂在陛下如不果數人者挾太上求劔南一道何以處之莫若請太上意去此數

人上從之太上行次南都聞政事改革疑召綱至則具道皇帝仁孝思慕請早還京師太上感悟泣數行下既還耿南仲欲屏太上左右與綱意不合劾綱卽上章懇辭上手詔諭留時北兵已去上下皆恬然綱以爲憂上備邊禦敵八事卽除河東北宣撫使言臣以愚直不見容進而死敵固臣之願第恐朝廷執議未堅并言唐恪聶山姦邪必悞國行次懷州時更議和止綱進兵又罷徐處仁吳敏許翰而相唐恪進聶山陳過庭等綱聞之歎曰事無可爲矣召綱赴闕尋以言者論落職金兵再至上悟和議之非除綱資政殿大學士領開封府事次長沙命率勤王兵入援未至都城失守康王開府承制復故官遺書曰閣下學窮天人忠貫金石當投袂而起以副民望及卽位拜尙書右僕射兼中書侍郎遣官迎勞綱入見涕泗交集復奏蒙陛下識擢相臣必令臣畢志盡慮乃敢受命因上議十事凡數千言翌日頒議於朝惟僭逆僞命留中綱言二事乃今政刑之大張邦昌在政府十餘年淵聖首擢爲相如能死守臣節感動人心敵未必若是而彼且爲得計及知天下不與始請太后垂簾聽政其僭僞始末斷以春秋之法非特將而已也臣今誓不與同列當以笏擊之至僞命臣僚駢肩反

面不知有恥四方聞之誰不解體因泣下上爲動容遂
謫邦昌潭州吳玠莫儔而下皆遷謫有差復請於河北
置招撫使河東置經制使擇有材畧者薦張所傅亮及
宗澤爲開封留守會朝廷議遣使於金命草表奏言陛
下以二聖遠狩正宜枕戈嘗膽內修外攘使刑政明而
中國強則二帝不俟迎請而自歸不然雖冠蓋相望卑
辭厚禮恐亦無益乞降哀痛之詔以感動天下上嘉納
之未幾黃潛善汪伯彥力主幸東南避敵上意已決綱
謂國之存亡於是焉別卽疏言自古中興之主起於西
北足以據中原而有東南起於東南不能復中原而有
西北蓋天下精兵健馬盡在西北若一旦委棄豈惟敵
得乘間以擾內地盜賊亦將蠡起爲亂跨州連邑陛下
雖欲還闕不可得矣況欲治兵勝敵以歸二聖哉疏上
留中不出是時潛善當國侍御史張浚復劾綱因罷提
舉洞霄宮凡綱所規畫軍民之政一切廢革車駕遂東
幸兩河郡縣相繼淪沒紹興二年復除湖廣宣撫使勦
平羣盜繼以徐俯劉裴論劾罷四年冬金及僞齊來攻
綱具防禦三策五年上問攻戰守備方畧綱言朝廷偏
據東南苟非大脩守備何以圖敵守備之宜當料理淮
南荆襄以爲屏蔽至論東南形勢莫如建康今未得復

舊都亦須權宜駐蹕天下未嘗忘宋雖西北之民亦陛下赤子特制於強敵可以綏懷若退避之策非臣所知往時自南都退而至維揚則關陝兩河失自維揚退而至江浙則兩淮東西失不知今將何適而可臣觀古讐敵之邦鮮復通使東晉渡江石勒遣使元帝命焚其幣不納今無故使往祇傷國體臣願自今後脩吾政事擇所當爲者一切以至誠爲之是非明邪正別賞罰當在陛下方寸間耳因上條六事陳弊十有五事經畫措置皆中興之要務八年王倫使北與金使來以詔諭江南爲名綱言彼意大畧欲陛下屈體降禮以聽受臣念陛下豈忘祖宗之業生靈之屬遽自屈服與衆論不合上意不忤曰大臣當如是九年除知潭州荆湖南路安撫使綱力辭遂允其請綱生平負天下重望以一身用舍係社稷生民安危每宋使至燕山必問李綱安否其爲遠人畏服如此十年薨年五十八贈少師謚忠定宋史有傳陳炤字光伯少工詞賦登第爲丹徒尉既而入帥幕改知朐山縣仍兼主管機宜文字丁母憂歸北兵至常州守趙與鑒走匿朝議以姚嘗知常州嘗以炤知兵辟爲通判或勸炤辭炤曰鄉邦淪沒何可坐視與其偷生而苟全不若死之愈也遂墨衰而出率義兵戰禦自夏徂冬

無錫金匱縣志 卷二十三
不下以功加帶行提轄文思院常將張彥攻呂城兵敗
降於北因盡言城中虛實攻益急元丞相伯顏自將圍
之常兵阻濠水為陳矢盡猶不降城破嘗死之炤斂兵
巷戰家人曰城東北圍未合可走常熟達臨安炤曰去
此一步非死所矣日中兵至死焉事聞贈炤朝奉大夫
直寶章閣官其子應鼇為將仕郎宋史有傳應鼇寶祐六年
鄉舉炤守城時赴平江乞援於文天祥復出家財犒軍
募義卒以補散亡宋亡後衣冠不改力耕教子以終其
身又炤有假子楊立聞炤死方自殺人義而救之遂伴
狂以終

楊宗達字子通祖邦父殉節建康父璿屬其弟再興於岳
飛收復西京戰沒臨穎璿始居邑之鴻山為無錫人宗
達性慷慨任俠當寶慶紹定間憤金人為患常輸金帛
佐軍以助餉功授將仕郎德祐元年元人大舉兵分道
向臨安遣降將呂文煥先驅入常守臣趙與鑒亡匿溫
人王良臣迎降三月姚訾及陳炤合謀起兵復常州元
兵攻圍不能下丞相伯顏親督軍二十萬旦暮且至宗
達語二子曰常臨安門戶常失守臨安不日可破事勢
危促極矣吾家世宋臣讐虜之心吾祖父未嘗一日忘
此吾父子捐軀捍患之日也遂遣長子震發詣平江文

天祥乞師而自與仲子濟良募集鄉勇數千星夜赴常會統制張全奉朝命來援與宗達約為犄角元兵大至全望風遁宗達獨率鄉民死戰殺傷相當元乃以數萬眾合圍宗達軍搏戰矢盡力窮竟遇害濟良年十九亦中矢死及天祥遣尹玉麻士龍救至宗達父子已死五日矣

嘉慶志云乾隆庚午志宗達父子死難廬陵鄧公光薦為之傳俞公貞木為楊氏譜序亦特書其事二公距宗達死時未遠撫訪宜實夫執干戈以衛社稷至父子同日并命固非尋常義舉但歷徵野乘雜記如姚崇陳昭各有誌載宗達姓氏逸亡并考之信國行實中亦無一語及之然陳昭事得載國史非其曾孫顯曾書告史官及得德祐日記亦不免湮沒忠義之傳固有幸不幸耶據傳書之以補遺闕

元

陳肅字伯將性嚴毅而好學於諸子百家無不貫串舉博學鴻才授蘭溪州判累官翰林學士兵部尚書河南行省左丞至元季竟歿於王事

明

錢鏞字季文忼爽有大畧洪武初以人材徵未受職即上書指斥時政上大怒下於理將殺之長子璧在家聞父得罪徒跣走金陵擊登聞鼓訟父冤願以身代衛士箠擊幾斃帝覽疏感動鏞得減死戍蜀

俞德惠字用濟洪武中舉經明行修授行人司行人奉命

使蜀繼而廣西龍州土同知趙宗壽構兵拒命復令德
惠賚敕往諭驅車徑前卒與賊遇逼降不屈為宗壽所
殺死時猶手執精微批不舍以道阻骸骨未歸葬衣冠
於繡嶺之下

嘉慶志云乾隆庚午志明洪武二十年八月高帝以開
平王子常茂安置廣西龍州適土同知趙貼堅死無子
其姪宗壽襲職而貼堅妻黃氏倚茂納其女為妾仍掌
土官印與閩省趙觀海通數凌辱宗壽會茂卒宗壽以
計取土官印上章言茂已死并械觀海等至京黃氏乃
告宗壽實從子不應襲宗壽復上章言狀帝以蠻夷遠
人並釋之後有告茂匿龍州未死前宗壽所言皆妄者
遂命德惠賚敕往諭宗壽捕茂入朝二十八年二月庚
辰詔右軍都督府榜諭宗壽及其軍民人等宗壽抗不
赴召五月詔發湖廣江西諸衛軍六萬人期秋初赴廣
討之既而德惠以逼降不屈為宗壽所殺凶問至京帝
益震怒八月特命左都督府楊文佩征南將軍印為總

兵官廣西都指揮使韓觀右軍都督府都督僉事宋晟
為左右副將軍率京衛馬步軍三萬會諸衛軍討宗壽
兼討奉議南丹向武諸州附宗壽者以兵部尚書唐鐸
參軍事未幾鐸自軍還言宗壽服罪乞罷兵九月宗壽
來朝十月奉議諸蠻平而德惠卹典竟未之及前志云
再使廣西值寇亂者非也嘉靖甲寅撫按陳洙孫慎始
合題請
建專祠

周衡字士平其學與兄文理弟拳當作權三人相師友衡洪

武中舉明經授本府訓導十三年召試江源論稱旨擢
右正言帝嘗詔蠲江南租已復徵之衡言不宜失信於
天下竟以直言論死

許靈字至善年十八舉洪武十八年進士授禮科給事中
美風度戚畹有欲妻以女者靈不從竟歸越歲入朝數

上封事時以操束郡縣吏太急靈疏言之又劾輔臣不職左遷桂平縣丞卒於官

李孟善字宗吉洪武中舉明經拜監察御史太祖一日以事將殺學士宋濂孟善力諫帝怒戍遼東

陸士隆字季平洪武中舉明經拜監察御史抗疏發胡惟庸姦狀忤旨見殺妻及子皆死之劉基爲作忠節孝三歌

張文煥字伯闇通春秋洪武中舉人材除儀真驛丞以材勇擢白洋鎮巡檢寇至文煥力戰戈折矢盡死之妻邵以十歲孤元保託文煥故人姚樞而自殺樞見行義傳

施武字宗武洪武中舉明經拜監察御史以言事謫渾源州亂嶺關巡檢死於謫所

吳肇字友山洪武中舉經明行修拜監察御史建文嗣位見齊黃削奪諸藩過亟嘗從容引漢事言李景隆非周亞夫比頗見優納會父憂歸未幾靖難兵渡江聞京師失守宮中火因北向叩頭慟哭曰臣有老母在未能殉也奉母逃遁山中或言變姓名從亡楚蜀間有人識之於西平侯第正統中禁解歸卜築於常之孟墅業醫養母及母年九十餘卒遂不復爲醫

王亨字仲理祖實元臨江路同知有詩名亨性嚴正通春

無錫金匱縣志 卷二十三
秋左氏學洪武中舉秀才授刑部郎擢四川按察僉事
大振風紀蜀人稱爲王鐵面會紅苗破城賊衆數萬亨
驅戍卒以戰爲賊所得縛而求金亨大罵體被三刃賊
無意殺之迺大叫辱國如此何以生爲以首觸牆不死
賊去後兩月卒於行臺

葛桓字仲威洪武中舉明經拜監察御史姊子徐弼字子
相以方孝孺薦官工部主事進兵部郎中參李景隆軍
事密奏景隆凶悖有異志爲景隆所陷戍甘肅桓亦與
景隆不協靖難兵入景隆降桓死之成祖卽位景隆卒
誣殺弼弼妻死無子二妾發功臣家爲奴皆卽日自經
死其族死者三十餘人

儲福洪武初隸燕山衛籍好讀書慕顏真卿文天祥之爲
人建文末挈母韓妻范逃去成祖卽位詔購戍卒入伍
福在籍中調曲靖衛當詣京師乃仰天哭曰吾雖一介
卒伍義不爲叛逆屈復挈母妻以行在道中日夜泣不
輟竟不食死妻范年二十奉姑甚謹每哭其夫輒走山
谷中發聲長號不使姑聞貧無以自存一日浣於澗上
見旁有蓆草因織蓆以養姑死居守墓旁至年八十餘
卒旣卒蓆草不生土人異之卽其所居葺爲庵名曰崇
孝崇禎十七年贈福指揮使諡貞義范贈淑人諡孝節

黃理字公理以貢除大名府推官性嚴介斷貴人子獄侃
侃執法幾爲刺客所戕理不顧擢兵科給事中累上封
事彈劾不避權貴三被廷杖殞而復甦後諫成祖北征
下獄上以敗歸特召出之先一日死獄中

倪峻字克明洪武二十三年舉人授郟城教諭歷泗水沙
縣知縣擢兵科給事中時文皇帝好佛峻上疏極諫忤
旨遣使占城後先浮海垂十二年初占城國王欲召見
峻峻力折之俾郊迎而後宣詔終都給事中

沈宗字原本正統九年以貢任鶴慶府照磨寇發死之
倪敬字汝敬峻孫正統十三年進士擢御史景泰初畿輔

饑命出視請蠲田租戶部持不可再疏爭竟得請巡按

山西奏罷入粟補官令戍將侵餉者悉治之再按福建
時議開銀礦敬抗疏引唐德宗爲言事得寢鎮守內臣
戴細保貪橫敬劾罷之而治其黨吏民相慶六年七月
以時多災異偕同官杜宥等陳敬天脩德六事謫宜山
典史英宗復辟起知祥符縣尋以都督府都事從安遠
侯柳溥西征師還卒敬善飲能詩明史有傳從子祚工草隸
祚子容舉人官漢州知州以廉名詩文亦有法

高曇字景雲以國子生除漳州府通判正統十四年討鄧
茂七府使曇督軍餉次於茶鋪遇賊將掠其芻糧執至

琥珀嶺見賊將脅以刃曇厲聲罵曰逆賊無狀上勞王師下毒百姓卽日且斷爾首懸市上敢肆猖狂戕爾父母賊遂殺之事聞贈工部員外郎

葛昊字原大景泰七年以貢授揭陽知縣潔廉有惠政忤監司不得殊擢遷城武衛經歷寇至偕指揮使沈文勤之皆死

顧可久字與新正德九年進士授行人武宗將南狩可久倡同官上言陛下輕萬乘棄九重忽垂堂之戒而甘馳駿之遊縱不自惜如宗廟太后何上怒廷杖之左遷國子學正世宗立錄諫臣擢戶部員外郎會追崇獻皇議

起可久又上疏諫復詔杖尋出守泉州移贛州擢廣東副使備兵瓊海按行諸部相其扼塞要害纂山海圖說峒黎出掠旁郡按圖窮治幾空其巢未幾免歸可久好讀書工書學鍾繇法從父弟可適字與行正德三年進士官刑部郎宸濠就擒牽連逮治多濫可適往按多所平反終參議

楊淮字東川正德十二年進士授戶部主事再遷郎中始監京倉革胥徒積弊殆盡繼監淮通二倉罷中官茶果之供除囤基及額外席草費最後監內庫奄人例有供餽淮悉絕之公勤廉慎爲尙書孫交泰金所重嘉靖初

將升興獻主於廟准與同官繼大臣臺諫之後抗疏執
 奏其明日伏闕候命未得眾號慟聲徹於內詔執其疏
 首八人餘固伏不退遂俱送詔獄越三日詔杖於廷准
 氣體孱弱當羣伏時或言自逸可免准曰吾小臣効區
 區之愚聞禍而逃非初心也既杖病創甚臥一月而卒
 子女貧無依秦金為經紀歸其喪後贈太常少卿明史有傳
 曹懷字于德正德十二年進士選庶吉士改戶科給事中
 武宗將南狩廷臣伏闕下諫者百五十有五人懷與焉
 詔與杖凡死者數人而駕卒不出歷吏科兵科嘉靖初
 詔廷臣集議大禮忤旨下詔獄復杖於廷創甚呻吟中

再疏論當事諸臣有五鬼刺天五經掃地之語聞者股
 栗然竟得不罪奉命稽察甘肅倉儲兵器出守永平調
 思恩致仕五鬼刺天五經掃地
 華鑰字德啟嘉靖元年鄉試第一明年第進士授戶部主
 事調職方司伏闕爭大禮與楊准同被杖不死忤尚書
 汪鋈去官居母憂以毀卒

張選字舜舉嘉靖八年進士知蕭山縣稱循良擢戶科給
 事中太廟祫祭帝遣勳臣代行選抗疏諫伏闕下候旨
 帝御文華殿覽疏震怒詔杖八十至三折挺選無委頓
 意謂杖者曰吾罪甘死但恐累明天子有殺諫臣名奪

職歸世宗大漸遺詔復原官進通政司參議隆慶中進

階朝列大夫

明史有傳

黃正色字士尚嘉靖八年進士知仁和縣再補香山移南海其座主霍韜家南海諸霍喜謂令必庇我及有犯者一繩以法諸霍怒馳書於韜然卒自斂戢擢南監察御史劾尚書張瓚武定侯郭勳會章聖太后梓宮祔葬承天荆山侯崔元禮部尚書溫仁和太監鮑忠奉命輔行在道橫甚正色列其怙寵贖貨諸不法狀上疏論劾世宗初大怒將窮治其事諸人懼誣正色於梓宮前乘馬揮扇遂詔獄將殺之以霍韜力救得廷杖戍遼東瀋陽

衛正色卽日囚服荷戈趨戍所著伍臺使者葺書院以居之不可間以易教授遼東士人多樂就之自是三十年未嘗一離尺籍穆宗卽位詔以原官擢大理寺丞歷

少卿進南太僕卿致仕祀遼陽三忠祠

明史與張選合傳

胡濬字原荆嘉靖四十四年進士知永豐縣移安福擢御史神宗卽位六月命馮保掌司禮監濬請嚴馭近習毋惑諂諛虧損聖德冬妖星見慈慶宮後延燒連房濬乞徧察掖廷中曾蒙先朝寵幸者體恤優遇其餘毋論老少一概放遣奏中有唐高則天語上怒斥爲民

明史附陳吾德

華白滋字紫梁官養利州學正崇禎六年交阯入寇城陷具衣冠死明倫堂妾姜氏殺其三歲兒從死

王孫蘭字晚仲崇禎四年進士累遷成都知府蜀宗人虐民民相聚將焚內江王第孫蘭撫諭之乃解以父憂歸服闋起官紹興修荒政遷廣東副使分巡南雄韶州二府連州徭賊爲亂馳勦三戰皆捷十六年張獻忠大亂湖南湖南彬州宜章與韶接壤孫蘭乞援督撫不應最後以七百人至一宿復調去及賊陷衡州肆屠戮韶所轄樂昌乳源仁化連州守將據城叛而賊所設僞官傳檄將至孫蘭仰天歎曰失封疆當死賊陷城又當死吾盍先死乎遂自縊後賊竟不至朝廷憫其忠予贈卹乾隆四十一年追謚節愍

明史有傳

馬世奇字君常希尹子世奇幼穎異嗜學有文名登崇禎四年進士選庶吉士授編修十一年帝遣詞臣分諭諸藩世奇使山東湖廣江西諸王府所至卻饋遺還進左諭德父憂歸久之還朝進左庶子帝數召廷臣問禦寇策世奇言闖獻二賊除獻易除闖難人心畏獻而附闖非附闖也苦兵也今欲收人心惟飭督撫鎮將嚴束部伍使兵不虐民民不苦兵則亂可弭帝善其言爲下詔申飭時寇警日亟每召對諸大臣無能畫一策世奇歸

金匱要略卷之三十三
邸輒太息泣下曰事不可爲矣十七年三月城陷世奇
方早食投筯起問帝安在東宮二王安在或言帝已出
城或言崩或又言東宮二王被執世奇曰吾欲不死安
之其僕曰如太夫人何世奇曰正恐辱太夫人耳方闔
戶見二妾朱李盛飾來前世奇訝曰若以我死將辭我
去耶對曰聞主人盡節來從死耳世奇領之二妾並經
死世奇端坐自引帛力縊迺死世奇脩頤廣頰揚眉大
耳砥名行居館各有聲好推獎後進爲人廉父死蘇州
推官倪長圩以贖鍰三千助喪世奇辭曰蘇饑留此可
用賑座主周延儒再相世奇同郡遠嫌除服不赴都及
還朝廷儒已賜死親暱者率避去世奇獨經紀其喪其
好義如此贈禮部右侍郎諡文忠 國朝順治十年改
諡文肅乾隆四十年又改曰忠肅明史有傳
錢振先字其若顧憲成識之童子中登崇禎四年進士歷
官金華知府以憂歸在東林與馬世奇龔廷祥以學問
名節相砥礪申酉之際避地湖州 大兵至投箸溪死
龔廷祥字伯興世奇弟子也崇禎十六年進士出劉理順
之門順治二年 大兵下江南廷祥時官中書舍人在
金陵慨然曰吾不可以負吾師因手書寄其子曰此時
惟捐軀以明志而已但思一見吾母不可得肝腸寸裂

遂具衣冠自投秦淮人咸聚觀廷祥恐救已躍出水面
搖手者三而沒乾隆四十一年追謚節愍

施召徵字克用崇禎十六年進士授陸川知縣勤於吏治
卓有賢聲山寇作亂被執不屈死乾隆四十一年追謚
節愍

賣雞皮薛叟逸其名五牧人行至高橋聞李自成破京師
大慟赴水死

過俊民字尊伯崇禎十年歲貢生授常熟訓導再補臨安
會兵潰邑吏皆望風遁民遂倚俊民爲守八月上丁俊
民方攝祭文廟兵卒至被執不屈縊死功臣山乾隆四

十一年入祀忠義祠

孫源文字南宮繼皋幼子諸生有至性善飲酒好讀書其
學經史百家無不畢覽軀幹短小服古衣冠慷慨語天
下事或古今成敗莫不窮其源流崇禎十七年聞京師
陷帝死社稷源文行坐悲泣無間晨夜及秋賦聞鴈詩
曰少小江南住不聞鳴鴈哀今宵清枕淚知爾舊京來
未幾咯血聲瘖淚盡而絕乾隆四十一年入祀忠義祠
又副貢生吳以馭字永臨亦痛哭不食卒

嚴紹賢一名葛字與揚一鵬兄子諸生素倜儻不事齷齪
細行順治二年薙髮令下紹賢大書屋壁曰守義全歸

遂自經於寢室婢張生春亦自縊一女幼絕乳死乾隆四十一年入祀忠義祠

華尚濂字靜觀允誠兄孫順治初允誠以不薙髮被執尚濂年十九婚甫彌月牽衣請從行遂偕允誠傳送江寧

既至諸將帥雜坐訊之允誠瞑目坐地無一言尚濂植立不跪令薙髮堅不從俱死

語在華允誠傳

僕薛成聞允誠被

執長慟不食先一日死僕朱孝聞訃亦號哭而絕

何以培字曰厚棟如孫以培少負氣節日講習擊刺戰陣之法福王時以良家子從軍命爲參將不得志卽棄官歸未幾南都破以培屏居湖濱懸其祖棟如像於室佩

所遺故劍家有名馬中夜或聞嘶噪聲拔劍起舞慷慨不自勝是時江南皆下邑人先歸附者欲除異己以自効以以培名聞知府某命其人檄致之有僧三山者故棟如家將詞得之夜半走告邀與俱亡以培歎曰吾世受國恩焉用逃死天明檄至持檄者卽以培戚也從容留飲談笑如平生請少須持檄者難之以培笑曰何以培男子豈懼死哉遂偕至郡知府陳衛卒露刃以培白衣冠束帶入軀長八尺餘豐頤白皙儀觀甚偉知府異之爲好語曰速降不失富貴曰吾世臣無降理曰不降且不得生曰願卽死再問答如初知府目左右喻意或

引以培耳語厲聲叱曰斫即斫耳何效兒女子為解衣就縛神色不少動遂斬於市以培既死妻黃氏欲以身殉家人言以培尸未得盍緩之黃乃竭貲購以培首以培以六月殉節至十月而首始得面如生黃為櫛髮啟棺納之尸亦不腐黃手為縫紉如全尸狀因練衣素食二十六年始歿黃安遠知縣廣女也又張以備福王時為守備謝歸大兵南下或薦於主帥召之以備先諷妻自盡乃見主帥帥勸之仕不屈遂見殺

案張以備事邑中遺聞舊乘無及之者嘉慶志據毘陵節烈傳錄入茲改附何傳竊疑其本一人而傳誤爾

顧杲字子方憲成從孫諸生詩文卓犖善草書好擊劍使

酒負奇氣崇禎之季闖黨阮大鍼僑寓南京覲以邊材召用杲與吳應箕左國材沈士柱黃宗義楊廷樞輩一百四十餘人作留都防亂揭討之所謂復社諸賢也未幾福王立馬阮柄國將盡殺諸人會國亡得免暨大兵徇江南杲盡散家財糾鄉里敢死士千人將援江陰誓師進發行至砂山鄉人以為盜也圍攻之及審其誤然創重不可救乃呼酒飲數升而歿子點蔗蒸皆死乾隆四十一年入祀忠義祠同起兵者高明瑒字聖培精天文與杲同遇害明瑒子綿士馳救父亦被殺

許學字習之崇禎十六年進士未授官即遭國變學悲憤

求死入密室將自經其母老矣救之謂曰許氏數世惟
汝一人且汝死吾安依學迺止後以不薙髮被執詣大
吏被髮覆面而入大吏曰此病狂人命扶出遂得免黃
冠野服屏居養母母死亦尋卒

華京字壯輿吳縣籍諸生從吳江進士吳易起兵於長白
蕩兵敗先驅妻子入水格殺數人後卒繼至手與搏戰
溺死

秦廷珪字延喜歲貢生福王時除長沙縣丞江南亡唐王
稱號福州督師何騰蛟檄令署善化縣事順治四年長
沙破湖湘悉平廷珪與其二女屏居關山冲赴水死僕
鄒義爲衣冠殯之

堵允錫字仲緘崇禎十年進士厯官長沙知府山賊掠安
化寧鄉允錫率鄉兵破滅之又殺醴陵賊魁遂以知兵
名十六年八月賊陷長沙允錫朝覲還賊已退明年六
月福王命爲湖廣參政分守武昌黃州漢陽左良玉稱
兵總督何騰蛟奔長沙令攝湖北巡撫事駐常德唐王
立拜右副都御史實授巡撫李自成死衆擁其兄子錦
爲主奉自成妻高氏及高氏弟一功領衆三十萬至澧
州言乞降遠近大震獨允錫議撫之乃入其營開誠慰
諭犒其軍皆踴躍拜謝乃卽軍中宴之導以大義數千

言明日高氏出拜謂錦曰堵公天人也汝不可負別部
田見秀劉汝魁等亦來歸唐王因加允錫兵部右侍郎
兼右僉都御史總制其軍手書獎勞授錦御營前部左
軍一功右軍賜錦名赤心一功名必正賞賚有差號其
營曰忠貞封高氏貞義夫人允錫欲結赤心等倚以自
強已而袁宗第劉體仁諸營先歸騰蛟者亦引與赤心
合眾益盛允錫以芻糧難繼令散處江北明年正月騰
蛟期諸軍盡會岳州赤心先至餘逗遛不進永明王立
進允錫兵部尙書總制如故順治四年永明王令赤心
等攻荊州月餘 大兵援荊州赤心等大敗走入蜀眾
饑乃散入施州衛聲言就食湖南時王在武岡劉承允
懼爲赤心所并計非允錫不能禦請加東閣大學士封
光化伯賜劍便宜行事允錫疏請得給空敕鑄印頒賜
秦中舉兵者八月 大兵破武岡及寶慶常德辰沅允
錫走永順土司尋赴貴陽抵遵義乞師於皮熊王祥又
入施州詣忠貞營軍會楚宗人朱容藩僞稱監國天下
兵馬副元帥居夔州御史錢邦芑傳檄討之五年正月
允錫乃見容藩責以大義曉譬利害遂散其黨未幾金
聲桓李成棟叛我 大清以江西廣東附永明王於是
馬進忠王進才曹志建李赤心高必正等乘間取常德

以下諸州縣允錫疑進忠有他志令赤心必正守進忠所取常德進忠盡焚廬舍去赤心等亦棄空城而東所至守將皆燒營棄城走湖南已復州縣盡為之墟允錫乃率赤心等入湘潭與騰蛟會騰蛟令允錫向江西而自率進忠等向長沙六年正月騰蛟被執允錫與胡一青守衡州戰敗走桂陽初赤心等人廣西龍虎關守將曹志建惡其淫掠或說志建允錫將召忠貞營圖志建志建夜發兵圍允錫允錫及其子逃入富川猺洞志建索之急猺潛送允錫於監軍僉事何圖復抵梧州會王遣人安輯忠貞營至梧而赤心等已走賓橫二州乃與

允錫謁王於肇慶時馬吉翔及李元允袁彭年專柄各樹黨允錫欲與吉翔激赤心等東來除元允又移書瞿式耜言王有密敕令其圖之元允黨丁時魁金堡論允錫喪師失地乃令移駐梧州允錫行至潯州憤悵發病卒王贈為潯國公諡文忠

明史有傳

案永錫世家宜興生長武進徙居無錫以錫籍登第後歸宜興詳見年譜考乘據以正嘉慶志生長無錫之誤

堵孫正字寅叔允錫從子八歲而孤十五工制舉業面試提學案前得雋工詩及篆刻善技擊會鼎革允錫奉唐藩命撫楚以書招之孫正甫婚數月得書告廟訣母妻而去偕允錫子孫驥入楚允錫命為前鋒統兵連復數

郡以恩義結李錦高一功之心而善撫之累官都督僉
 事掌錦衣衛事驅馳五載身經百戰己丑四月守永興
 爲我 大清兵所破巷戰力竭死東郭門內年二十四
 妻沈氏生一女事姑孝謹備歷艱苦不變其志又三十
 餘年卒人以方范孝節云

嘉慶志云華氏宗譜載元華濬字希明樂平縣萬山監
 稅率民拒賊死明華福字寧一官南京義勇衛征廣南
 有功戰白溝河陣亡華珊常德衛百戶嘉靖時征陽朔
 陣亡子本衛世襲華應鶴字少峰與華碩敏楊冠世俱
 以順治乙酉死於兵華葆素字伯冲諸
 生明亡殉節無他書可考附識於此

國朝

秦華鍾字元發禾曾孫順治四年歲貢授富川知縣屬有

兵事三年乃莅其土撫叛歸俘民漸復業無何滇寇大
 至被執賊勸之降鍾大罵尋就縊守者覺而救之乃挾
 以行方渡江伺間投水死贈按察使僉事子祭葬官其
 子止爲戶部主事曾孫雄飛進士官至江西布政使
 張令憲字嘉仲順治四年歲貢授香山知縣滇寇破香山
 令憲及子丹翰皆見殺贈令憲按察使僉事子祭葬錄
 其孫進爲浮梁知縣令憲師王家諫字培萱明諸生工
 詩文尙風節當熹廟時璫禍方烈家諫悲歌痛哭發憤
 死其弟子皆砥礪名節而令憲尤著

王日杏字丹宸雲錦孫乾隆十八年舉人由內閣中書軍

機處行走歷戶部郎中出知銅仁府罷職仍授中書隨
大學士溫福赴雲南會有金川之役以功擢刑部主事
三十八年六月兵潰木果木殉焉贈光祿寺少卿入昭
忠祠

楊夢槎字再騫乾隆二十一年舉人寄浙江籍榜名張槎
後復姓改今名官鄆都知縣會 大兵征金川隨定邊
將軍營管礮局兵潰木果木被執脅降不從賊環跪請
點礮法乃給令裝藥過度礮裂斃賊甚眾夢槎死之贈
兵備道入昭忠祠

浦寶光官宣恩縣乾壩巡檢會湖北教匪滋事奉檄募鄉
勇勦旗鼓寨賊寶光馳至三保嶺遇賊奮身追殺賊旣
眾死之子祭葬入昭忠祠

吳兆麟字德洲副貢生知鳳山縣會海盜蔡牽船竄入海
口兆麟亟募義勇防禦內地有盜乘機聚眾攻掠兆麟
擊退之斬其首賊以狗追捕至淡水溪賊愈眾地中火
藥突發兆麟死之子祭葬入昭忠祠時兆麟幕友周蓮
聞變單騎赴救同被害亦予祭葬入祠兆麟從孫爾鎮
官宿遷主簿在河工久以勤慎稱同治中擢靈璧知縣
未赴任奉檄查勘睢河酷暑步行蘆葦間中暍卒得優
卹

鄒鳴鶴字鍾泉父麟書舉人文名著都下尙書那清安出其門由故城知縣改江寧教諭赴任時歲歉道殣相望隨予掩埋終淮安府教授鳴鶴嘉慶二十五年進士歷任河南知縣擢知開封府道光二十一年河決張灣壞省垣二十餘丈衆洶洶議遷鳴鶴上六不可遷之議毀貢院磚石堵塞城闔露宿城上八閱月城得完丁生母憂服闋爲江西督糧道

文宗登極詔京外薦拔賢材侍郎侯桐趙光合疏薦鳴鶴擢順天府尹出爲廣西巡撫時賊洪秀全等倡亂陷永安州大學士賽尙阿統諸軍駐陽朔省城存兵二百餘賊乘間悉銳來攻鳴鶴誓衆登陴固守會提督向榮倍道赴援戰守三十三晝夜賊解圍去俄竄全州鳴鶴竟坐失援轄境落職歸兩江總督陸建瀛特奏調赴江甯以六品頂戴辦沿江防堵至則建瀛已率師溯流上乃與將軍祥厚等等守禦策部署未定而建瀛自九江敗還賊躡之直薄江甯鳴鶴知事不可爲書絕命詩二章付子覲儀揮之去城陷死之以道員例議卹同治中朝廷從兩江總督曾國藩請照巡撫例優卹謚壯節鳴鶴性剛果洪聲偉幹勇於任事讀禮家居時廣書院膏火及賓興公車等費革除現年總甲之役皆鳴鶴爲之

倡鄉里德之

王步雲字月莊少時父命入市肆習賈樸慇爲人笑乃發憤讀書中嘉慶二十三年舉人官桃源訓導咸豐十年正月捻匪猝至步雲分守東城子試用訓導士斌及文生張弼堂楊逢春等率勇禦賊賊麇至弼堂逢春戰死士斌傷步雲見事急命妻張士斌妻鄒女孫宏生招弟增弟佩貞婢巧如投泮池已乃朝服端坐明倫堂賊至突起批賊頰賊怒斷其十指復以鞞尖趨賊賊跣之斫足指盡步雲罵益厲士斌至請以身代不得竟截舌碎顛死年七十二士斌亦投泮池死並贈國子監學錄銜

李福培字仲謙道光二年舉人咸豐初以教習期滿授從化知縣時賊起廣西擾及縣境福培累戰却賊四年三月擒斬賊目謝亞青等賊撲廣州福培請大府以兵二千守花縣之石角及從化之太平場以保諸邑兼斷賊糧道不報七月賊突至禦之東門賊分兵奪北門而入福培集民兵力戰退之又敗賊于麻村良口等堡九月賊悉衆來攻礮洞城城陷福培迎戰不能支退登尊經閣磔石殪賊賊聚薪其下脅之福培罵益烈與從弟性培典史趙應端僕周鏞勇丁蘇兆英等同死于火贈知府銜同治中許建專祠謚剛烈其殉節處血影儼然後

之官其地者爲石關以護之

秦炳章字震煊道光十二年順天籍舉人官鶴慶州知州
調署龍陵廳咸豐四年土寇作亂死之

王恩綬字樂山道光二十九年順天舉人教習宗學期滿
以知縣用時湖北寇患方劇以闕員請揀發選人皆難
之輒謁假不往恩綬慷慨曰時事多艱正人臣效忠之
日而顧擇地自便乎乃聽選果發湖北咸豐五年二月
抵武昌賊圍攻急城閉不得入胡文忠林翼以布政使
駐軍城外惜恩綬才欲留贊軍務不可曰以揀發來省
而逗遛營中是取巧也繼而入翌日城陷巷戰死子燮

僕丁貴吳福壽皆殉贈知府銜燮主簿銜同治中得建
專祠謚武愍恩綬少時以文受知于巡撫林文忠則徐
俾讀書衙齋李福培其外兄也以行誼相砥鏃卒皆以
知縣死節同時予謚而恩綬未受事之員得謚尤爲異
數云

張應蘭字佩之原名蘭階道光二十二年舉人咸豐三年
從軍天津累以書抵大帥言軍事四年三月與從九品
魯勉訶賊臨清州入其營爲所得賊識爲文士禮之不
顧脅以刃瞋目大罵拘十餘日見西北塵起賊察應蘭
色喜詰之大言曰逆賊速殺我我將爲鬼引大軍至矣

賊怒剝其腹而死官軍至得應蘭及勉尸照知府例議卹應蘭擅才藻工詩歌駢儷文詞面白皙修飾邊幅然遇意所不可輒抵几叫罵人不能堪嘗客河南某守所意氣不相中遺書絕交拂然去其書傳誦京洛間

華元超字安之道光二十九年拔貢生成豐七年以向武州判署平樂知縣境偪于寇元超至卽議戰守具請大府于城東羅漢嶺扼險爲備未十日而游匪張龍祥率衆分犯上下二關攻西南門元超卓旗登城手難礮擊賊賊環攻益急守弁皆退賊自羅漢嶺布雲梯入元超力竭被執賊壯其貌欲用之元超怒罵不屈剖腹剜心以死年二十七其戚薛文元于叢屍中識其履乃夜取之并翼元超妻子踰城出

嵇榮培字藥園曾筠曾孫事母至孝客游以養恒寓家揚州咸豐三年賊破揚州居人爭易敝服走且匿榮培獨衣冠立門外賊見愕然榮培厲聲斥之遂遇害母秦及妻女皆自經死

林蔚字霞巖以吉安府經歷擢知德化縣調鄱陽鄱陽無城郭再陷于賊落職旋以功復原官賊躡永新永甯蔚援之吉安戒嚴按察使周玉衡檄蔚助守援絕糧盡城遂陷蔚格鬪死時咸豐六年正月也又有楊福鬯國子

生客吉安知府陳宗元幕亦死于難後吉安南昌建祠祀玉衡祔同死者四十一人蔚與焉福鬯亦祔宗元祠祝錫勳字湘洲以江西候補通判留本省軍營嘗從張忠武國樑攻復丹陽句容等縣咸豐八年協守溧水早夜乘城九月賊大至城陷死之贈知府銜祀溧水昭忠祠華廷榕爲提督周天培主文案天培攻克鎮江援浙勦賊廷榕實左右之咸豐九年九月以會勦浦口賊與天培同歿于陣

顧崑場字賦亭官遵義知縣治苗匪有威惠地方以安調知威甯州擢知府去咸豐十年苗撲威甯上官以崑場悉心苗情命督團助守城陷死之子以勳爲浙江巡檢亦于是年死難杭州

賈爾畿定遠巡檢尙氣有力嫻武藝集鄉兵親訓練之得精悍五百人禦賊屢挫其鋒賊大恚悉銳來攻爾畿戰死爾畿在官有惠民德之爲棺斂歸其喪

溫榮培字厚卿廩生咸豐十年粵賊南下邑戒嚴榮培主西門團練局巡防無少懈四月九日賊逼三里橋提督張玉良方退保無錫檄榮培赴榮巷運糧行及惠山會宜興賊越山蜂擁至榮培以數十人與戰不敵被擒大罵不屈死

虞廷皋字賡颺道光十五年副貢生工舉業為邑名師咸豐十年廷皋分守邑城城陷而死于汝翼亦以拒賊死于鄉

顧箴字風時貢生主講淮安麗正書院二十年性方鯁人或少越禮盛氣呵斥無所避里中皆嚴憚之咸豐十年粵匪破城箴大罵不屈死年八十一子德垣亦死之

許繼柏字寶巖由桐鄉縣丞擢新樂知縣以老乞休性耿介足迹不入城市聞警家人請遠避怒曰人患不得其死耳吾年已九十復何求賊至繼柏踞坐大罵遂遇害吳彝鐘字作音諸生成豐三年江甯失守邑人皆徙彝鐘

大言曰寇來惟死耳何避為眾笑之十年賊至彝鐘不屈被重傷夜乃縱火自焚子婦陶從嫂楊從孫女二人皆死彝鐘年七十一

蔣鎰字仲衡國子生大鏞兄咸豐十年約鄉人行分坊團練法及城陷令各鄉團眾鳴金拒賊有竄入者輒殺之既而賊大隊至執其弟弒脅降鎰謂弒曰此吾兄弟致命之日也大罵不絕聲皆遇害

薛華平字雲卿成平字虞卿禮社人兄弟皆篤行能文成平嘗刲肱療父疾邑城陷集團禦賊七月六日賊大至團眾潰華平兄弟死之成平妻華挈一女投水死

浦錦堂朱貞柏皆開化鄉武生邑城陷誓殺賊保鄉營揚名大橋南戰輒勝錦堂善射多智略製子母礮以擊賊遠近義民皆歸之七月朔賊大至奮戰自晨至午錦堂恃勇登橋巔發矢連殪悍賊賊飛礮中之墮橋下大呼貞柏曰我已矣君勉之貞柏力敵逾時而死賊亦引去計聚金萬安鄉人有脅力南禪寺僧曰道德者精武藝避居鄉之祠山殿因相約集團累創賊鄉里恃其保障者數年同治二年四月各路潰賊麇至二人知勢不敵麾衆退曰吾兩人以死當之君等宜自爲計乃扼賊于匡橋格鬪逾時擊殺數十人而後死衆人因得脫歸事定爲位于祠山殿側並祀焉

廖長生成豐十年以勇丁守南門四月十日賊自水關入長生奮搏却數賊賊擁矛爭入不能當躍登岸潰兵數十自北來長生呼之皆反走有舊家子朱姓等倉皇欲出城長生其鄰也乃送之東門外曰君等自此去吾還視老母還遇賊鬪死于巖家池頭

附

梁國泰楊氏僕也山東人矯健善鬪在陳墅寨門等處累盪狂寇江陰王元昌方倡義集團延國泰共事戰于昆山祝塘松橋殺賊無算金匱常熟江陰三邑鄉團皆倚

之每戰必陷陣賊憚焉詐空江陰城以誘元昌信之以
三千人屬國泰往國泰不可強之行果遇伏覆軍國泰
跳而免尋乞餉蕩口蕩口人疑之夜殺之甘露各團自
是不振

